


續後漢書

二



書 漢 後 繢

(二)

郝 經 撰

續後漢書卷第三

帝紀第二

義例曰。末帝繼昭烈在位四十餘年。爲魏所滅。降封安樂公。而終于晉。謚曰思。陳壽三國志稱昭烈爲先主。故稱帝爲後主。通鑑稱漢主。目錄稱安樂思公。晉謂孫皓爲後主歸命侯。隋謂陳帝爲後主長城公是也。綱目雖正其統體。更先主爲昭烈皇帝。仍曰後主。則昭烈先主也。有未安者。今正其位號而無謚。劉元海雖謚曰孝懷皇帝。偏霸不可謚正統之帝。故不從。案歐陽修五代史。梁亡而均王無謚。稱末帝。今漢亡而帝亦無謚。故更後主爲末帝云。

末帝

末帝諱禪。字公嗣。母曰甘皇后。建安十二年生于荊州。二十四年昭烈爲漢中王。立爲王太子。及卽皇帝位。立爲皇太子。冊曰。惟章武元年五月辛巳。皇帝若曰。太子禪。朕遭漢運艱難。賊臣篡盜。社稷無主。格人羣正以天明命。朕繼大統。今以禪爲皇太子。以承宗廟。祇肅社稷。使使持節丞相亮授印綬。敬聽師傅行一物而三善皆得焉。原注。禮記行一物而三善皆得者世子而已。其故于學之謂也。鄭元曰。物猶事也。可不勉與。三年夏四月。昭烈崩于永安宮。五月。帝卽皇帝位于成都。年十七。原注。魚豢魏略。初備在小沛。不意曹公卒至。遑遽棄家屬。後奔荊州。禪時年數歲中。賈得禪。問知其良家子。遂養爲子。與娶婦生一子。初禪與備相失時。識其父字元德。比舍人有姓簡者。及備得益州。而簡爲將軍。備遣簡到漢中舍都邸。禪乃詣簡相檢。訛事皆符驗。簡喜。以語張魯。魯乃洗浴送至益州。備乃立以爲太子。初備以諸葛亮爲太子太傅。及禪立。以亮爲丞相。委以諸事。謂亮曰。政由葛氏。祭則寡人。亮亦以禪未閑于政。遂絕內外。裴松之曰。二主妃子傳曰。後主生于荊州。後主傳云。初卽帝位。年十七。則建安十二年生也。十三年

敗于長阪。備棄妻子走。趙雲傳曰。雲身抱弱子以免。卽後主也。如此。備與禪未嘗相失也。又諸葛亮以禪立之。明年領益州牧。其年與主簿杜微書曰。朝廷今年十八。與禪傳相應。理當非虛。而魚豢云。備敗于小沛。禪時始生。及奔荊州。能識其父字元德。計當五六歲。備則敗于小沛。時建安五年也。至禪初立。首尾二十四年。禪應過三十矣。以事相驗。理不得然。此則魏略之妄說。乃至二百餘言。異也。又按諸書記及諸葛亮集。亮亦不爲太子太傅。尊皇后曰皇太后。大赦改元建興。以丞相亮領益州牧。南中四郡皆叛。秋八月遣尚書郎鄧芝修好于吳。孫權遂絕魏與漢。原注 孫氏始稱吳與其國也。立皇后張氏。

二年夏吳使輔義中郎將張溫來聘。復遣鄧芝報之。

三年春三月丞相亮南征。秋七月亮討雍闐。原注音愷斬之。遂平四郡。十二月亮還成都。

四年春都護李嚴自永安移屯江州築大城。原注 裴松之曰 今巴郡故城是留護軍陳到駐永安。夏五月曹丕卒。子叡立。

原注 凡魏吳二主卒立。與凡特稱。皆書姓名。漢之僭爲。不成其爲君也。其君臣皆書卒而無別略也。

五年春三月丞相亮出屯漢中以討魏。詔曰。朕聞天地之道。福仁而禍淫。善積者昌。惡積者亡。古今常數。也是以湯武修德而王。桀紂極暴而滅。曩者漢祚中微。網漏凶慝。董卓造難。震蕩京畿。曹操階禍竊執天衡。殘剝海內。懷無君之心。子不孤豎。敢尋亂階。盜據神器。更姓改物。世濟其凶。當此之時。皇極幽昧。天下無主。則我帝命隕越于下。昭烈皇帝體明叡之德。光演文武。應乾坤之運。出身平難。經營四方。人鬼同謀。百姓與能。兆民欣戴。奉順符識。建位易號。不承天序。補弊興衰。存復祖業。誕膺皇綱。不墜于地。萬國未定。本作未定。與此合。宋早世遐殂。朕以幼冲。繼統洪基。未習師保之訓。而嬰祖宗之重。六合壅否。社稷不建。

永惟所以念在匡救。光載前緒，未有攸濟。朕甚懼焉。是以夙興夜寐，不敢自逸。每崇謹案志，注崇作從。毛本作崇。與此合。菲

薄以益國用，勸分務穡，以阜民財。授方任能，以參其聽。斷私降意，以養將士。欲奮劍長驅，指討凶逆。朱旗未舉，而已殞喪。斯所謂不然。我薪而自焚也。殘類餘醜，又支天禍。恣睢萃反。原注河洛阻兵，未弭。諸葛丞

相宏毅忠壯，忘身憂國。先帝託以天下，以勗朕躬。今授之以旄鉞之重，付之以專命之權。統領步騎二十

餘萬，董督元戎，襲行天罰，除患寧亂。克復舊都，在此行也。昔項籍總一彊衆，跨州兼土。所務者大，然卒敗

垓下，死于東城。宗族如焚，爲笑千載。皆以不義陵上，虐下故也。

原注 史記太史公曰。項羽乘勢拔起龍畝之中。三年遂將五諸侯兵滅秦。分裂天下而封王侯。

政由羽出。號爲伯王。位雖不終。近古以來。未嘗有也。及羽背關懷楚。放逐義帝而自立。怨王侯畔已難矣。自矜功伐。

奮其私智而不師古。謂伯王之業。欲以力征經營天下。五年卒亡其國。身死東城。尙不覺寤。而不自責。過矣。迺引天亡我。

非用兵之罪也。

•豈不謬哉。•今賊效尤，天人所怨。奉時宜速，庶憑炎精祖宗威靈相助之福。所向必克。吳王孫權同恤災

患，潛軍合謀，掎角其後。涼州諸國王各遣月支、康居、胡侯、支富、康植等二十餘人，詣授節度。大軍北出，便

欲率將兵馬奮戈先驅。天命既集，人事又至。師貞勢并，必無敵矣。夫王者之兵，有征無戰，尊而且義。莫敢

抗也。故鳴條之役，軍不血刃。牧野之師，商人倒戈。今旆麾首路，其所經至，亦不欲窮兵極武。有能棄邪從

正，簞食壺漿以迎王師者，國有常典，封寵大小各有品限。及魏之宗族，文葉中外，有能規利害，審逆順之

數來詣降者，皆原除之。昔輔果絕親于智氏，而蒙全宗之福。

原注 戰國策。智伯與韓魏圍趙襄子于晉陽。張孟談陰見韓魏之君曰。智伯伐趙。趙亡則二君爲之次

•二君乃與孟談陰約。夜遣人入晉陽。智果見二君說智伯曰。二主色動而變必背君矣。不如殺之。智伯曰。不可。智果出。易姓爲輔氏。微子去殷。項伯歸漢。皆受茅土之慶。

原注 史記

徵子數諫紂不聽。乃持其祭器奔周。周公誅武庚。立微子于宋。以續殷後。漢王以魯公禮葬項王于穀城。封項伯等四人皆爲列侯。賜姓劉氏。此前世之明驗也。若其迷沈不反。獎助亂人。不式王命。戮及妻孥。罔有攸赦。廣宣恩威。誅其元惡。弔其殘民。他如詔書律令。丞相其露布天下。使稱朕意焉。孟達復以新城來歸。

六年春。魏將司馬懿陷新城。孟達死之。丞相亮伐魏。攻祁山、天水、南安、安定。皆舉郡降。參軍馬謖原注：所六反。及魏將張郃戰于街亭。敗績。馬謖伏誅。亮請自貶。詔以亮爲右將軍行丞相事。冬。亮復出散關。圍陳倉。斬魏將王雙。

七年春。右將軍亮伐魏。拔武都、陰平二郡。復拜丞相。夏五月。孫權稱帝。改元黃龍。遣使以並尊二帝來告。詔遣衛尉陳震賀之。權與震盟約中分天下。豫、青、徐、幽屬吳。兗、冀、并、梁屬漢。司州之土。以函谷關爲界。冬。亮徙府營于南山下。原上築漢樂二城。

八年秋。魏將曹真等入寇。丞相亮次于城固赤阪。魏師還。丞相司馬魏延敗魏雍州刺史郭淮于陽谿。徙魯王永爲甘陵王。梁王理爲安平王。以魯梁在吳分界故也。

九年春二月。丞相亮伐魏。圍祁山。三月。亮敗魏將郭淮于上邽。夏六月。亮擊敗魏將司馬懿于齒城。大敗之。殺其將張郃。秋八月中。都護李平有罪。廢徙梓潼郡。十年春。丞相亮休兵于黃沙。

十一年冬丞相亮使諸軍運米集斜谷口治斜谷邸南夷劉胄反將軍馬忠討之

十二年春二月丞相亮約吳大舉伐魏三月孝獻皇帝崩于山陽夏四月亮進軍渭南魏將司馬懿引兵拒守亮軍于五丈原分兵屯田秋八月亮薨于軍前軍師魏延作亂丞相長史楊儀擊斬之率諸軍還成都初大赦原注皆書初凡故所未有特爲者以左將軍吳懿爲車騎將軍假節督漢中以丞相留府長史蔣琬爲尚書令總統國事原注本所在凡尚書令季漢政遣中郎將宗預使吳

十三年春正月中軍師楊儀有罪廢徙漢嘉郡夏四月以蔣琬爲大將軍錄尚書事費禕爲尚書令

十四年夏四月帝至湔原注裴松之曰湔縣名屬蜀郡音翦登觀阪看汶水之流旬日還成都武都氐王符健降徙氐民四百餘戶于廣都

十五年秋七月皇后張氏崩

延熙元年春正月立皇后張氏大赦改元立子璿爲皇太子子瑤爲安定王冬十一月大將軍琬出屯漢中詔曰寇難未弭曹叡驕凶遼東三郡苦其暴虐遂相糾結與之離隔叡大興衆役還相攻伐暴秦之亡勝廣首難今有此變斯乃天時君其治嚴總帥諸軍屯住漢中須吳舉動東西掎角以乘其釁

二年春正月曹叡卒子芳立夏以大將軍琬爲大司馬

三年春越巂原注音隨蠻夷叛太守張嶷討平之

四年夏大司馬琬徙屯涪。

五年春正月監軍姜維督偏軍自漢中徙屯涪。

六年冬十月遣前監軍王平督漢中十一月大赦以尙書令費禕爲大將軍錄尙書事。

七年春三月魏曹爽夏侯元等寇漢中鎮北大將軍王平拒興勢圍閨月謹案閨月毛本作閨二月此書在春三月後當是閨三月大將

軍禕擊爽于三嶺魏師敗走夏四月安平王理薨秋九月以大將軍禕領益州刺史侍中董允爲尙書

八年秋八月皇太后吳氏崩冬十一月大司馬琬薨謹案蜀志蔣琬卒在九年冬十一月琬傳亦云至九年薨此書在八年誤十二月尙書令董

允卒尙書呂乂爲尙書令宦者黃皓爲中常侍大將軍禕至漢中行圍守

九年夏六月大將軍禕還成都秋大赦以涼州刺史姜維爲衛將軍與大將軍禕並錄尙書事原注琬卒禕

乃自攝國事末帝卽位年已十七卽臨政使諸葛亮南征北伐故亮將出師言末帝當親賢而遠小人宮中府中俱爲一體陸罰臧否不宜異同則諫其虛事之際當任公道若猶未聽政亮其爲是言哉魏略之語殆不其然

十年春涼州胡王白虎文治無戴等率衆降衛將軍姜維居之于繁縣汶山平康夷反維平之帝數出遊

觀增廣聲樂太子家令譙周諫不聽

十一年夏五月大將軍禕出屯漢中秋涪陵屬國民夷反車騎將軍鄧芝討平之

十二年春正月魏司馬懿殺曹爽夏侯霸來奔夏四月大赦秋衛將軍姜維伐魏攻雍州不克將軍句安李韶叛降魏

十三年冬衛將軍姜維伐魏攻西平不克。

十四年夏大將軍禪還成都冬復北駐漢壽大赦尙書令呂乂卒以陳祗守尙書令。

十五年夏四月孫權卒子亮立立子琮爲西河王。

十六年春正月盜殺大將軍禪謹案陳志爲魏降人郭循所殺此據綱目書盜夏四月衛將軍姜維伐魏圍狄道不克。

十七年春正月大赦夏六月衛將軍姜維復出隴西伐魏秋七月魏司馬師廢其主芳爲齊王立丕孫髦原注稱主者正其號以罪師也冬十月姜維拔狄道河間謹案後漢書地理志隴西郡有河關而無河間此仍陳志之訛姜維傳俱同臨洮三縣民居于縣竹繁縣維與魏將徐質戰于河間敗績盜寇將軍張嶷死之道。

十八年夏衛將軍姜維復率諸軍出狄道伐魏秋八月維及魏雍州刺史王經戰于洮西大破之遂圍狄道。

十九年春以姜維爲大將軍秋七月大將軍維伐魏及魏將鄧艾戰于段谷敗績維請自貶詔以維爲後將軍行大將軍事立子瓚爲新平王大赦。

二十年冬十二月後將軍維伐魏出駱谷次于芒水大赦。

景耀元年春後將軍維還成都復拜大將軍史官言景星見于是大赦改元宦人黃皓始專政冬十月吳孫綽林反原注丑廢其主亮爲會稽王立權次子休大將軍維徹漢中諸圍兵退屯漢壽守漢樂二城。

二年夏六月立子謐爲北地王恂爲新興王虔爲上黨王秋八月尙書令陳祗卒以董厥爲尙書令諸葛瞻爲僕射。

三年春正月魏司馬昭弑其主髦立燕王曹宇之子奂秋九月追謚故將軍關羽張飛馬超龐統黃忠四年春三月追謚故將軍趙雲冬十月大赦以董厥爲輔國大將軍諸葛瞻爲都護衛將軍共平尙書事以樊建爲尙書令。

五年春正月西河王琮薨大將軍維伐魏及魏將鄧艾戰于侯和敗績還住沓中魏謀大舉入寇維表遣左右車騎張翼廖化督諸軍分護陽安關口及陰平之橋頭黃皓信巫鬼謂敵終不自致啓帝寢其事

炎興元年春詔立故丞相亮廟于沔陽秋八月魏將鄧艾鍾會諸葛緒數道入寇遣左右車騎將軍張翼廖化輔國大將軍董厥等拒之大赦改元九月鍾會率諸軍之漢中使將軍李輔圍王舍于漢城護軍荀愷圍蔣斌于樂城會徑趨陽安關口守將傅僉死之大將軍維逆戰敗走與廖化張翼董厥合兵守劍閣以拒會冬十月鄧艾自陰平趨涪至江油守將馬邈降艾衛將軍諸葛瞻及鄧艾戰于縣竹敗績及其子尚皆死之艾之成都帝用譙周策降于艾奉書曰限分江漢遇值深遠階緣謹案原本作階緣毛本蜀志文義較順今據改蜀土斗絕一隅干運犯冒漸苒歷載遂與京畿攸隔萬里每維黃初中文皇帝命虎牙將軍鮮于輔宣溫密之詔申三好之恩開示門戶大義炳然而否聽暗弱竊貪遺緒俛仰累紀未率大教天威既震人鬼歸能

講案·陳志歸能下有之數二字·疑衍

怖駭王師·神武所次·敢不革面順以從命·輒敕羣帥投戈釋甲·官府帑藏一無所毀·百

姓布野·餘糧栖畝·以俟后來之惠·全元元之命·伏惟大魏布德施化·宰輔伊周·含覆藏疾·謹遣私署侍中張紹·光祿大夫譙周·駙馬都尉鄧良奉齎印綬·請命告誠·敬輸忠款·存亡敕賜·惟所裁之·輿櫬在近·不復縷陳·北地王謐不降·死之·紹良與艾相遇于雒縣·艾卽報曰·王綱失道·羣英並起·龍戰虎爭·終歸真主·此天命去就之道也·自古聖帝爰逮漢魏·受命而王者·莫不在乎中土·河出圖雒·出書聖人·則之以興洪業·其不由此·未有不顛覆者也·隗囂馮隴而亡·公孫述據蜀而滅·原注·後漢書建武六年·隗囂使王元據隴坻·遣使稱臣于公孫述·述以囂爲朔寧王·九年·

囂死·王元立囂子純爲王·明年周璆等將純降·建武元年·公孫述僭號成家·十二年吳漢克成都·滅公孫述·

此皆前世覆車之鑒也·聖上明哲·宰相忠賢·將比隆

黃軒·侔功前代·銜命來征·思聞嘉響·果煩來使·告以德音·此非人事·豈天啓哉·昔微子歸周·實爲上賓·君子豹變·義存大易·來辭謙沖以禮·輿櫬皆前哲歸命之典也·全國爲上·破國次之·自非通明智達·何以見王者之義乎·遣紹良先還·帝又遣太常張峻·益州別駕汝超受節度·遣太僕蔣顯敕大將軍維等降·又遣尚書郎李虎送士民簿領戶二十八萬·男女口九十四萬·帶甲將士十萬二千·吏四萬人·謹案·通典曰·蜀後主炎興元年·則魏嘗道鄉公景元四年·歲次癸未·是歲魏滅蜀·至晉武帝太康元年·歲次庚子·凡十八年·月增九十八萬六千三百八十一·口增八百四十九萬九百八十二·則當三國鼎峙之時·天下通計戶四十七萬三千四百三十三·口七百六十七萬二千八百八十一·以奉三主·斯以勤矣·米四十餘萬斛·金銀各二千斤·錦綺綵絹各二十萬匹·艾至城北·帝輿櫬自縛詣軍門·原注·晉諸公贊·劉禪乘驃車詣艾·不具亡國之禮·承制拜帝爲驃騎將軍·諸圍守悉被帝敕降·大將軍維

率諸將降于鍾會。艾居帝于故宮。資嚴未發。

二年。謹案。通鑑綱目。炎興元年冬十月。帝出降。漢亡。次年書魏咸熙元年。炎興無二年。此稱二年。春正月。艾見

收鍾會自涪至成都作亂。將軍胡烈等討斬之。太子璿。大將軍維并遇害。帝舉家東遷至雒陽。降封帝爲

安樂縣公。策命之曰。惟景元五年三月丁亥皇帝臨軒。使太常嘉命劉禪爲安樂縣公。於呼。其進聽朕命。蓋統天載物。以咸寧爲大。光宅天下。以時雍爲盛。故孕育羣生者。君人之道也。乃順承天者。坤元之義也。

上下交暢。然後萬物協和。庶類獲乂。乃者漢氏失統。六合震擾。我太祖承運龍興。宏濟八極。是用應天順

民。撫有區夏。于時乃考因羣傑。虎爭九服。不靜乘間。阻遠保據。庸蜀遂使西隅殊封。方外壅隔。自是以來。

干戈不戢。元元之民。不得保安其性。幾將五紀。朕永惟祖考遺志。思在綏輯四海。率土同軌。故爰整六師。

耀威梁益。公恢崇德度。深秉大正。不憚屈身委質。以愛民全國爲貴。降心回慮。應機豹變。履信思順。以享

無疆之休。朕嘉與君公長享顯祿。用考咨前訓。開國胙土。率遵舊典。錫茲元牡。苴以白茅。永爲魏藩輔。往

欽哉。公其祗服朕命。克廣德心。以終乃顯烈。食邑萬戶。賜絹萬匹。奴婢百人。他物稱是。子孫爲三都尉。封

侯者五十餘人。尙書令樊建。侍中張紹。光祿大夫譙周。祕書令郤正。殿中督張通。並封列侯。晉泰始七年。

帝崩于雒陽。謚曰思公子。恂嗣。原注。陳壽評曰。後主任賢相則爲循理之君。惑闇豎則爲昏暗之后。傳曰素絲無常

之古義。體理爲違。又國不置史。注記無官。是以行事多違。災異靡書。諸葛亮雖達于爲政。凡此之類。猶有未周焉。然經載十二。而年名不易。軍旅屢興。赦不妄下。不亦卓乎。自亮沒後。茲制漸虧。優劣著矣。裴松之曰。赦不妄下。

誠爲可稱。至于言年不易。猶所未達。按建武建安之號。皆久而不改。未聞前史以爲美談。經載十二。蓋何足云。豈別有他意。求之未至乎。亮沒後。延熙之號。數益二十。茲制漸虧。事又不然也。謹案史通曰。陳氏三國志劉後主傳曰。蜀無史職。故災祥靡聞。案黃氣見于秭歸。羣鳥墮于江水。成都郡有景星出。益州言有宰相氣。若史官不置。此事從何而書。又曰。案蜀志稱王崇補東觀。許蓋掌禮儀。又郤正爲祕書郎。廣求益部書籍。斯則典校無闕。屬辭有所矣。而陳壽評云。蜀不置史官。得非厚誣諸葛乎。

議曰。太甲克聽伊尹。成王終信周公。故皆爲賢君。末帝奉昭烈之命令。諸葛亮南征北伐。卒信討賊之義。亮沒而繼用蔣費。終亮遺意。維持宗社四十餘年。亦太甲成王之次也。當永安屬續之際。有嗣子不才。君當自取之言。其時豈無宵人哉。苟有疑焉。亮能安乎。其未踰年而改元。國君卽位柩前。必踰年改元。緣始終之義。一年不二君。緣臣子之心。不忍有變于中年也。末帝于章武三年夏五月即位。卽改元爲建興。非制也。陳氏譏之是也。亮薨而卽大赦。至于終惑閼闈。墮隕先志。不死社稷。甘爲降虜。爲可責已。國不置史。注記無官。行事多遺。災異靡書。方漢賊不兩立。王業不偏安。以誅仇討逆爲先務。日不暇給。未可求備也。贊曰。季末中庸受命。彌留克聽。弗違濟師。誅仇終惑孽寺。遂傾大寶。組頸軍門。竟同軼道。原注。史記。沛子嬰繫頸以組。白馬素車。奉天子璽。降輶道旁。樓桑枯死。杜鵑不來。原注。成都記。杜宇亦曰杜主。自天而降。稱望帝。好稼穡。教人務農。時荊州靈死。其尸泝流而上。至汶山下。復生。見望帝。好稼穡。教人務農。因以爲相。號曰開明。會巫山壅江。又遭洪水。開明爲鑿渠流。有大功。望帝因以其位禪焉。後皇帝死。其魂化爲鳥。名曰杜鵑。亦曰子規。博物志。杜鵑生子。寄之他巢。百鳥爲飼之。後惠陵草深鬱有遺哀。劍門猶險。巴賓勿歎。原注。晉書。巴賓人李特隨流人將入蜀。至劍閣。箕踞歎息。豈非庸才邪。氣數當窮。天啄有漢。

續後漢書卷第四上

列傳第一上

后妃謹案·帝紀及家人傳皆有義例·后妃諸王傳當亦有之·今無·疑闕·

昭烈甘皇后 穆皇后兄懿 懿族弟璡

末帝敬哀張皇后 張皇后

昭烈甘皇后沛人也昭烈領豫州住小沛納以爲妾昭烈數喪嫡室常攝內事生末帝于荊州昭烈寢于當陽長阪棄后及末帝賴趙雲保護得免后崩葬于南郡章武二年追謚皇思夫人改葬于蜀未至而昭烈崩丞相亮上言皇思夫人履行修仁淑慎其身大行皇帝昔在上將嬪配作合載育聖躬大命不融大行皇帝篤義垂恩念皇思夫人神柩在遠飄颻特遣使者奉迎曾大行皇帝崩今皇思夫人神柩已到又梓宮在道園陵將成安厝有期臣輒與太常賴恭等議禮記曰立愛自親始教民孝也立敬自長始教民順也不忘其親所由生也春秋之義母以子貴原注·公羊傳·桓幼而貴·隱長而卑子以母貴母以子貴昔高皇帝追尊太上昭靈夫人爲昭靈皇后原注·漢書高祖五年·追尊先嫗曰昭靈夫人·高后七年·尊昭靈夫人曰昭靈后孝和皇帝改葬其母梁貴人尊號曰恭懷皇后原注·漢書·和帝永元九年·追尊皇妣梁貴人爲皇太后·冬十月乙酉·改葬恭懷梁皇后于西陵孝愍皇帝亦改葬其母王夫人尊號曰靈懷皇后原注·後漢書·獻帝興平元年·改葬恭懷梁皇后于西陵

年追尊謚皇妣爲靈懷皇后。改葬于文昭陵。今皇思夫人宜有尊號。以慰寒泉之思。原注詩爰有寒泉在浚之下有子七人母氏勞苦輒與恭等按謚法宜曰昭烈皇后。詩曰：穀則異室。死則同穴。故昭烈皇后宜與大行皇帝合葬。臣請太尉告宗廟。布露天下。具禮儀別奏制曰可。

穆皇后陳留人也。兄吳懿少孤。懿父與劉焉有舊。是以舉家隨焉入蜀。焉有異志。而聞善相者相后當大貴。焉時將子瑁自隨。遂爲瑁納后。瑁死后寡居。昭烈旣定益州。而孫夫人還吳州。原注漢晉春秋云先生入益兵斷江留太子乃得止。吳遣迎孫夫人。夫人欲將

太子歸吳。諸葛亮使趙雲勒。羣下勸昭烈聘后。昭烈疑與瑁同族。法正進曰：論其親疏。何與晉文之于子圉乎。于是納后爲夫人。原注左氏傳晉太子圉爲質于秦秦歸河東而妻之太子圉逃歸惠公卒圉立是爲懷公晉文公至秦秦伯納女五人懷羸與焉晉鑿齒曰夫婚姻人倫之始王化之本匹夫猶不可以無禮。而况人君乎。晉文廢禮行權以濟其業。故子犯曰有求于人必先從之。將奪其國何有于妻。非無故而違禮教者也。今先生無權事之偏。而引前失以爲譬。非導其君以堯舜之道者。先主從之過矣。建安二

十四年立爲漢中王。章武元年夏五月策曰：朕承天命。奉至尊。臨萬國。今以后爲皇后。遣使持節丞相亮授璽綬。承宗廟母天下。皇后其敬之哉。建興元年五月。末帝卽位。尊后爲皇太后。稱長樂宮。延熙八年。后崩。合葬惠陵。建興八年。進封懿高陽鄉侯。遷左將軍。十二年丞相亮薨。以懿督漢中車騎將軍假節領雍州刺史。進封濟陽侯。弟班。末帝世稍遷至驃騎將軍。假節封綿竹侯。謹案建興八年以下大典另爲一條據文併歸本傳之末後仿此

末帝敬哀張皇后。車騎將軍張飛長女也。章武元年納爲太子妃。建興元年立爲皇后。十五年崩葬南陵。張皇后敬哀皇后之妹也。建興十五年入爲貴人。延熙元年春正月策曰：朕統承大業。君臨天下。奉郊廟

社稷今以貴人爲皇后使行丞相事左將軍向朗持節授璽綬勉修中饋恪肅禋祀皇后其敬之哉炎興

二年隨末帝遷雒陽者李昭儀曰我不能二三屈辱乃自殺

原注漢晉春秋云魏以蜀宮人賜諸將之無妻

議曰后妃之德周室爲盛太姜太任太姒至于邑姜太姒文王妃呂姜武王妃也世嗣徽音自家刑國以至于天下雖堯之明峻德親九族舜之烝烝又觀厥刑于二女無以尚已故文王演易重巽于離風自火出明內齊外名之曰家人其繇曰利女貞孔子爲之傳曰女正位乎內男正位乎外男女正天地之大義也父父子子夫夫婦婦正家而天下定及其刪詩以關雎詠歌后妃推爲正風之始蓋夫婦人倫之本風化之原聖王所以修身而平天下者在乎是矣周室衰微家道日乖至秦而母后始與政外戚始當

國原注史記秦昭王立王少宣太后自治事任其弟魏冉爲政威震秦國

原注呂氏上官氏事見昭烈紀漢書孝宣霍皇后大將軍光女也母顯使淳于

衍陰殺許后立其女爲皇后光薨顯與諸婿昆弟謀反伏誅孝宣許皇后昌邑許廣漢之女也宣帝在民間時廣漢

以女妻之生元帝及卽位立爲皇后爲霍顯藥殺之其後封廣漢爲平恩侯

許氏侯者凡三人孝成許皇后大司馬

車騎將軍平恩侯嘉女也孝成趙皇后與女弟俱爲健仔既立爲皇后而弟絕幸爲昭儀帝未有繼嗣凡後宮有子輒殺

之平帝立王莽廢后爲庶人遂自殺孝元傅昭儀哀帝祖母也哀帝卽位尊爲皇太太后凡傅氏侯者六人平帝

立王莽發其冢更以木棺代去珠玉衣掘平其冢周棘其處定陶丁姬哀帝母也易祖師丁將軍之元孫哀帝卽位

尊爲帝太后兄明爲大司馬驃騎將軍輔政侯者凡二人王莽亦發其冢更以木棺孝元王皇后凡十侯五大司馬

至莽卒篡至竇鄧閻梁原注後漢書章德竇皇后大司徒融之曾孫也殺皇太子慶母宋貴人及和帝母梁貴人和帝漢云

即位尊爲皇太后臨朝稱制和熹鄧皇后太傅禹之孫也和帝崩立殇帝太后臨朝立

安帝復臨朝在位二十年安思闇皇后殺皇太子保母李氏廢皇太子爲濟陰王安帝崩太后臨朝以兄顯爲車騎將軍定策立北鄉侯懿北鄉侯薨顯又徵濟北河間王子而中黃門孫程等立順帝誅顯廢太后程等皆封侯號十九侯順烈梁皇后帝崩立沖帝太后臨朝沖帝崩復立質帝太后猶臨朝后兄大將軍冀弑質帝立桓帝而誅李固宦官多所封寵而天下大亂專朝易主竊命移國閨闥內訌姻

姪外瀆牀第之間。總爲牆茨。遂無正家之道。無復唐虞三代風化之美矣。其內官之制。依仿秦舊。帝母曰皇太后。祖母曰太皇太后。嫡曰皇后。妾皆稱夫人。又有美人、良人、八子、七子、長使、少使、婕妤、嬪娥、容華。充依昭儀等號。以備內官。各有品秩焉。原注 漢書昭儀位相爵比諸侯王婕妤視上卿比列侯嬪娥視中二千石比顯內候容華視真二千石比大上造美人視二千石比少上造八百石比中更充依觀千石比左更七子視八百石比右庶長良人視八百石比左庶長長使視六百石比五大夫少使視四百石比公乘五官視三百石順常視二百石無涓共和娛靈保林良使夜者皆視百石上家人子中家人子視有秩斗食云五官以下葬司馬門外孝哀入繼大統傳太后稱尊號于是有恭皇太后恭皇后帝太太后皇太太后等皆亂制也。原注 漢書哀帝卽位高昌侯董宏希指上書言宜立丁姬爲帝太后師丹劾奏宏懷邪誤朝不道上初卽位謙讓從師丹言止後乃白令王太后下詔尊定陶恭王爲恭皇哀帝因是曰春秋母以子貴尊傳太后爲恭皇太后丁姬爲恭皇后各置左右詹事食邑如長信宮中宮歲餘遂下詔曰漢家之制推親親以顯尊尊定陶恭皇之號不宜復稱定陶其尊恭皇太后爲帝太太后丁后爲帝太太后後又更號帝太太后爲皇太太后稱永信宮帝太后稱中安宮而成帝母太皇太后本稱長信宮成帝趙后爲皇太后並四太后各置少府太僕光武中興稱號惟皇后貴人其後置美人宮人采女等而無爵秩昭烈志期恢復不幸而與操遇用武無所奔走狼狽屢棄妻子晚未得蜀戰爭方始祇立一后內職不備亦可以觀其志烈也甘后備嘗險阻終享大號宜哉二張后皆車騎將軍飛之女不忘佐命之義締親勸闥又可見末帝之賢也羣下勸昭烈納穆后帝以同族爲疑法正乃勉以辰贏終玷大德惜哉贊曰帝皇受命代資內德娠聖承天自家刑國不有淑徽曷正壺範兩君四后道隆先漢

續後漢書卷第四下

列傳第一下

昭烈二王

魯王永 梁王理

末帝太子六王

太子璿弟璡璵璸
謙恂虔

魯王永字公壽昭烈子末帝庶弟也章武元年六月使司徒靖立永爲魯王策曰小子永受茲青社朕承天序繼統大業遵修稽古建爾國家封於東土奄有龜蒙世爲藩輔嗚呼恭朕之詔惟彼魯邦一變適道治化存焉人之好德世茲懿美王其秉心率禮綏爾士民是饗是宜其戒之哉建興八年改封甘陵王初永憎宦人黃皓皓旣信任用事譖構永於末帝稍疏外永至不得朝見者十餘年炎興二年東遷雒陽拜奉車都尉封鄉侯

梁王理字奉孝亦末帝庶弟也與永異母章武元年六月使司徒靖立理爲梁王策曰小子理朕統承漢序祇順天命遵修典秩建爾於東爲漢藩輔惟彼梁土畿甸之邦民狎教化易導以禮往悉乃心懷保黎

庶以永爾國。王其敬之哉。建興八年改封安平王。延熙七年薨。謚曰悼王子。哀王允嗣十九年薨。子殤王輯理子也。炎興二年東遷雒陽。拜奉車都尉。封鄉侯。

謹案目錄此下有末帝太子璿傳今闕。

安定王璠。河西王琮。新平王瓚。北地王諶。新興王恂。上黨王虔。皆太子璿之弟也。璠以景耀五年薨。漢亡。諶自殺。見死國傳。璠等五王從末帝遷雒陽。晉永嘉之亂。祚允絕滅。惟魯王永之孫元奔蜀。李雄封爲安樂公。以爲末帝嗣。桓溫平李勢。元入于晉。不知其所終。原注 陳志。自太子璿外見璠。琮。瓚。諶。恂。虔六人。孫盛蜀世譜亦六人。有璿而無虔。未知孰是。孫盛曰。永和三年討李勢。盛
參戎行。見元於成都。

議曰。二帝無曹氏之寡恩。孫氏之內亂。而祚允單寡。生於衰末。卒無有成。寢微寢滅。而璿傷死於亂。嗚呼。天不祚漢。乃至此極乎。

贊曰。六孽分封。

原注 漢書。高帝八男。呂后生孝惠帝。薄姬生孝文帝。齊悼惠王肥。趙隱王建。淮南厲王長。趙幽王友。趙共王恢。燕靈王建。六王皆庶孽也。

使黃河如帶。泰山若礪。

磬石之宗。犬牙相制。慶自代來。本支百世。

原注 文帝生景帝。自孝武至光武昭烈。皆景帝子孫也。

中山義義涿

水湯湯。派衍祥啓。復一高光。三起三滅。

原注 謂高祖至平帝。光武至獻帝。昭烈至末帝也。

二帝七王。緝熙漢道。於戲不忘。

續後漢書卷第五

列傳第二

宗室諸劉

義例曰。寵故諸侯王。自焉以降。皆漢室之胄。爲牧伯而不終者也。陳壽以劉虞爲魏諸僭。虞以死拒山東之議。而爲公孫瓊所害。何事於魏哉。又以焉。璋爲蜀二牧。與先主共爲蜀書。皆私意也。焉。璋亦漢賊耳。豈得並興復漢室之帝乎。繇。表漢之牧伯。繇爲孫策并滅。表子琮降操。則自漢臣也。而以繇爲吳之僭偽。表爲魏之僭偽。皆非也。故皆以爲宗室而繫之漢云。若劉曄。劉放雖亦帝室之胄。乃佐操父子篡漢。而終臣於魏。故以爲魏臣。絕不爲親也。

陳王寵 劉焉子璋 董扶 劉虞 劉繇子基 劉表子琦 王雋 傅巽 王雋 韓嵩

陳王寵。明帝子敬王羨之後也。羨始封廣平。徙封西平。帝崩。遺詔封陳。食淮陽郡。薨。子思王鈞嗣。薨。子懷王竦嗣。無子。立敬王子安壽亭侯崇。是爲頃王。薨。子孝王承嗣。薨。子寵嗣。熹平二年。國相師遷追奏前相魏愔與寵共祭天神。希幸非冀。罪至不道。有司奏遣使者案驗。是時新誅勃海王悝。靈帝不忍復加法詔。槛車傳送愔。遷詣北寺詔獄。使中常侍王酺原注。華嶠漢書及宦者傳諸本並作甫。此云酺。未知孰是。音蒲。與尚書令侍御史雜考愔。辭與王共祭黃帝老君。求長生福而已。無它冀。幸酺等奏愔職在匡正。而所爲不端。遷誣告其王罔。以不道。皆誅死。有詔赦寵。寵善弩射。十發十中。中皆同處。原注。華嶠漢書。寵射。其祕法以天覆地載。參連爲奇。又三微三小。三微爲經。三小爲緯。經緯相將。爲萬勝之方。

然要在機牙。中平中黃巾賊起，郡縣皆棄城走。寵有強弩數千張，出軍都亭治兵自守。國人畏之，不敢離叛。國相會稽駱俊素有威恩，時天下飢荒，陳獨完富，鄰郡人多歸之。俊傾廩振贍，皆得全活，有衆十餘萬。獻帝初，義兵起，寵率衆屯陽夏，自稱輔漢大將軍。後袁術求糧於陳，而俊拒之，術忿恚，遣客詐殺俊及寵。陳由是破敗。原注 謝承漢書俊字孝達烏傷人察孝廉補尚書侍郎擢拜陳國相人有產子厚致米肉達府主意生男女者以駱爲名袁術使部曲將張闖陽私行到陳之後所俊往從飲酒因詐殺俊一郡吏人哀號如喪父母是時諸國無復租祿，而數見虜奪，并日而食，轉死溝壑者甚衆。夫人姬妾多爲丹陵兵烏桓所略，及曹丕篡代，自封國已除滅者，其餘光武子趙孝王良、後博陵王珪、原注謹案後漢書趙孝王良光武叔父此冠以光武子與東海恭王強等並列疑誤東海恭王強、後汝陽侯羨、沛獻王輔、後恭王曜、子契、東平憲王蒼、後頃王端、子凱、任城孝王尙、後新昌侯子佗、明帝子彭城靖王恭、後孝王和、孫祇、梁節王暢、後敬王元、子彌、章帝子河間孝王開、後濟南王康子某。原注後漢書稱開不應與祖同諱故闕疑曰某云謹按後漢書濟某南王康子贊爲黃巾賊所害子開嗣此以開爲濟南王康子疑誤皆降封崇德侯，頗食租賦，而重禁錮。不得遷徙仕宦。晉泰始初始除漢宗室禁制。

謹案目錄此下有劉焉、劉虞傳今闕，又陳王寵、劉焉當有議今亦闕。

劉繇字正禮，東萊牟平人也。齊孝王少子封牟平侯，子孫家焉。原注史記年表孝王齊悼惠王肥子將閭也繇祖父本博學，號稱通儒。舉賢良方正，爲般長卒父輿，一名方，有雋才。終山陽太守。伯父寵，以經明行修，舉孝廉，察四行，累遷會稽太守。有惠政，徵爲將作大匠。山陰父老子六七人，相率送寵，人齎百錢去。縣數十里，自若耶山谷間。

遮寵曰自明府下車狗不夜吠吏稀到門年老遭值聖化今聞當去故戮力來送寵謝之選受一大錢故號一錢太守入居九列四登三事以太尉辭位卒於家繇年十九從父諱爲賊所劫質繇篡取以歸由是顯名舉孝廉爲郎中除下邑長時郡守以貴戚託之遂棄官去州辟部濟南濟南相中常侍子貪穢不法謹案陳志作貪穢不循通志循下有法字繇奏免之平原陶丘洪薦繇欲令舉茂才刺史曰前年舉公山奈何復舉正禮乎洪曰若明使君用公山於前擢正禮於後所謂御二龍於長塗驕驥驥於千里不亦可乎會辟司空掾除侍御史不就避亂淮浦詔書以爲揚州刺史時袁術在淮南繇畏憚不敢之州欲南渡江吳景孫貢迎置曲阿術圖僭逆攻沒諸郡縣繇遣樊能張英屯江邊拒之以景貢術所授用迫使去於是術自置揚州刺史與景貢并力攻英能等歲餘不下詔加繇爲牧振武將軍衆數萬人謹案今志作衆萬餘人宋本及孫策東通志皆作衆數萬人與此合孫策東渡破英能等繇使太史慈拒策慈爲策所擒繇悉衆與策戰大敗策遂入曲阿盡虜繇妻子部曲繇走丹徒將奔會稽許子將曰會稽富實策之所貪且僻在海隅不可往也不如豫章北連豫壤西接荊州若收合吏民遣使者貢獻與曹兗州相聞雖袁公路爲間其人豺狼不能久也足下受王命且帝室之胄謹案志注無此字

孟德景升必相救濟繇從之遂泝江南保豫章駐彭澤使笮原注杜力反融先往助豫章太守朱皓討袁術所用謹案志注作劉表所用太守諸葛元許子將謂繇曰笮融出軍不顧名義者也謹案志注作不顧命名義者也州府無命字與此合朱文明善推誠以信人宜使密防之融到果詐殺皓代領郡事繇進討融爲所破更復招合屬縣攻破融融敗

走入山爲民所殺。繇尋病卒，時年四十二。後孫策西伐江夏，還過豫章，收載繇喪，善遇其家。王朗遺策書曰：劉正禮昔初臨州，未能自達，實賴尊門爲之先後，用能濟江成治。有所處定，踐境之禮，感分結意，情在終始。後以袁氏之嫌，稍更乖刺，更以同盟還爲讎敵，原其本心，實非所樂。康寧之後，常願渝平更成，復踐宿好，一爾分離，款意不昭，奄然殂隕，可爲傷恨。知敦以厲薄，德以報怨，收骨育孤，哀亡愍存，捐旣往之猜，保六尺之託，誠深恩重分，美名厚實也。昔魯人雖有齊怨，不廢喪紀；春秋善之，謂之得禮。誠良史之所宜籍，鄉校之所歎聞。正禮元子致有志操，想必有以殊異威盛刑行，施之以恩，不亦優哉？繇長子基字敬輿，年十四，居繇喪盡禮，故吏餽餉皆無所受。基遭多難，潛處味道，與羣弟居常夜臥早起，妻妾稀見其面。諸弟敬憚事之猶父，不妄交游，門無雜賓。孫權愛敬之，權爲驃騎將軍，辟東曹掾，拜輔義校尉，建忠中郎將，權爲吳王遷大農，權嘗宴飲，騎都尉虞翻醉酒犯忤，權欲殺之，威怒甚盛。基犯顏諫爭，翻以得免。方大暑，權宴飲船樓上，雷雨大作，權以蓋自覆，又命覆基，餘不覆也。其見待如此。徙郎中令，權稱尊號，改光祿勳，分平尚書事。年四十九卒。後權爲子霸納基女，賜第一區。四時寵賜與全張比，基二弟鑠、尙皆騎都尉。繇兄岱字公山，歷位侍中。董卓以爲兗州刺史，與袁紹同起兵討卓，青州黃巾大入州界，岱欲擊之，濟北相鮑信諫不聽，與戰，果爲所殺。

議曰：漢祚剝裂，天枝蠹敝，遺胄遐孤，耽沈骯音委•骯音委•，莫能自振。劉虞獨能飭身厲行，忠厚恭儉。

化行幽朔。夙夜憂勤。志存王室。致使董卓畏服。羣雄見推。卻尊號而不受。奉章表以自通。振振哉漢家賢宗子衛武公東平憲王之儔也。原注·國語·武公年九十五矣·猶歲戒於國·恭恪于朝·作抑詩自儆·至沒身·謂之微聖。手詔國中傳曰·日者問東平王處家何等最樂·王言爲善是樂·其言甚大·副是要腹矣。不幸而爲公孫瓚所襲。惜哉范蔚宗曰。若虞瓚無間。糾人完聚。稽保燕薊之饒。繕兵昭武。以臨羣雄之隙。舍諸天運。徵乎人文。則古之休烈。何遠之有。嗚呼。天不佑漢。盜憎主人。其能無間乎。又弱一个焉。劉氏危矣。劉繇當治平之世。足爲賢方伯。素無禦亂應變之才。惡能拒袁術之僭。嬰孫策之鋒哉。折敗以死。於是宗室諸劉盡矣。本根無所庇蔭。天子獨守虛器。操遂弑后酖子。除封國。重禁錮。使無噍類。然後攘取。乃不能殺昭烈。而漢統歸之。終自爲僭僞。豈非天哉。鮮于輔爲虞復讎。迎和附紹。從臾義烈。蹙瓚於死。盡臣子之義矣。

劉表字景升。山陽高平人。魯恭王餘之後也。身長八尺餘。姿貌溫偉。年十七。受學於同郡王暢。暢爲南陽太守。過於儉。齋表進諫曰。奢不僭上。儉不逼下。蓋中庸之道。是故蘧伯玉恥獨爲君子。府君若不師孔聖之明訓。而慕夷齊之末操。無乃皎然自遺於世。暢答曰。以約失之者鮮。且吾以矯世也。由是知名。與同郡張隱薛郁、王訪、宣靖公緒、恭劉祇、田林爲友。俱被訕議。號爲八顧。又與汝南陳翔、范滂、魯國孔昱、渤海苑康、山陽檀敷、張儉、南陽岑晊爲八及。原注·後漢書·及者·晉其能導人追宗者也。三君八俊錄。陳翔字子麟。汝南邵陵人。官至御史中丞。海內貴珍。陳子麟。范滂字孟博。汝南鄉陽人。爲太尉掾。海內譽謗范孟博。孔昱字世元。終於洛陽令。海內才珍孔世元。苑康字仲真。渤海重合人。官至泰山太守。海內彬彬苑仲真。檀敷字文友。山陽瑕丘人。爲蒙令。海內通士檀文友。張儉字元節。山陽高平人。官至衛尉。海內忠烈張

六節·岑晊字公孝·南陽棘陽人·爲太尉掾·

詔書捕案黨人表亡走得免黨禁解辟大將軍何進掾爲北軍

中候初平元年長沙太守孫堅殺荊州刺史王叡原注·王氏譜·叡字通耀晉太保祥之伯父也

原注·宗黨共爲賊

又袁術屯魯陽盡有南陽之衆吳人蘇代領長沙太守貝羽爲華容長各阻兵爲亂

表乃單馬入宜城請南郡名士蒯良荆越襄陽蔡瑁與共謀畫表謂越曰宗賊甚盛而衆不附若袁術因之禍必至矣吾欲徵兵恐不能集其策安出良曰衆不附者仁不足也附而不治者義不足也苟仁義之道行百姓歸之如水之趣下何患所至之不從而問兵興與策乎顧問越曰治平者先仁義治亂者先

權謀兵不在多在得人也袁術勇而無斷蘇代貝羽匹夫之勇不足慮也宗賊率多貪暴爲下所患越有所素養者使示之以利必持衆來使君誅其無道諸案·陳志無使字·後漢書有使字與此合施其才用威德旣行袖負而至矣

兵集衆附南據江陵北守襄陽荊州八郡原注·漢官儀荊州管長沙零陵桂陽南陽江陵武陵南郡章陵可傳檄而定公路雖至無能

爲也表曰子柔之言雍季之論也異度之計舅犯之謀也

原注·呂氏春秋時晉文公將與楚人戰于城濮召舅犯而問楚衆我寡奈何而可舅犯對曰臣聞繁禮

之君不足于文繁戰之君不足于詐君亦詐之而已文公以舅犯言告雍季雍季曰竭澤而漁豈不得魚而明年無魚焚藪而田豈不得獸而明年無獸詐僞之道雖今偷可後將無復非長術也文公用舅犯之言而敗楚人于城濮反而爲賞雍季在上左右諫曰城濮之功舅犯之謀也君用其言而後其身或者不可乎

文公曰雍季之言百代之利也舅犯之言一時之務也焉有以一時之利先百代之利乎

遂使越遣人誘宗

賊帥至者十五人諸案·陳志作五十五人·後漢書作十五人·此從後書皆斬之而襲取其衆惟江夏賊張虎陳生擁兵據襄陽城表使越與龐季往譬之乃降江南悉平諸守令聞表威名多解印綬去表遂理兵襄陽以觀時變袁術與其

從兄紹有隙，而紹與表相結，故術與孫堅合從襲表。表敗，堅遂圍襄陽。會表將黃祖救至，堅爲流矢所中，死。餘衆退走。及李傕等入長安，表遣使奉貢。傕欲連表爲援，乃以表爲鎮南將軍、荊州牧，封成武侯，假節。建安元年，天子將還雒陽，表遣兵助修宮室，軍資委輸千里，不絕。及遷都許，表遣使貢獻，復北結袁紹。治中鄧羲諫，表不聽。答羲曰：「內不失職貢，外不背盟主，天下之達義也。治中獨何怪乎？」羲乃辭疾而退。終表之世，不仕。驃騎將軍張濟自關中走南陽，因攻穰城，中飛矢死。荊州官屬皆賀。表曰：「濟以窮來，主人無禮，至於交鋒，此非牧意。牧受弔不受賀也。」使人納其衆，衆聞之喜，遂皆服從。三年，長沙太守南陽張羨性屈彊，表不禮焉。郡人桓階說羨舉長沙、零陵、桂陽三郡叛表，附曹操。表遣兵攻之，連年不下。羨病死長沙，復立其子惲。表攻破惲，盡平三郡。原注：英雄記·張羨，南陽人。先作零陵桂陽守。甚得江湘間心。於是開土益廣。南接五嶺。原注：裴氏廣州記·大庚一也；桂陽甲騎二也；九真都羅三也；臨賀、桂陽、揭陽，是謂五嶺。鄧德明南康記·大庚二也。北據漢川，地數千里，帶甲十餘萬。初，荊州人好亂，加四方駭震，寇賊相扇，處處麋沸。表招誘有方，威懷兼洽，其姦猾宿賊更爲效用，萬里肅清，咸悅而服之。關西竟豫學士歸者，蓋千數。表安慰賑贍，皆得資全。遂起立學校，博求儒術，慕母從事中郎南陽韓嵩，別駕劉先說表曰：「今豪傑並爭，兩雄相持，天下之重，在於將軍。若欲有爲，起乘其敝。」

可也。如其不然。固將擇所宜從。豈可擁甲十萬。坐觀成敗。求援而不能助。見賢而不能歸。此兩怨必集於將軍。恐不得中立矣。曹操善用兵。且賢俊多歸之。其勢必舉袁紹。然後移兵以向江漢。恐將軍不能禦也。今之勝計。莫若舉荊州以附曹操。操必重德將軍。長享福祚。垂之後嗣。此萬全之策也。蒯越亦勸之。表狐疑不斷。乃遣嵩詣操。觀望虛實。謂嵩曰。今天下未知所定。曹操擁天子都許。君爲我觀其釁。嵩對曰。聖達節次守節。嵩守節者也。今策名委質。惟將軍所命。雖赴湯蹈火。死無辭也。以嵩觀之。曹公之明。必得志於天下。將軍若欲歸之。使嵩可也。如其猶豫。嵩至京師。天子假嵩一職。不獲辭命。則成天子之臣。將軍之故吏爾。在君爲君。不復爲將軍死也。惟加重思。表以爲憚使。強之至許。果拜嵩侍中零陵太守。及還。盛稱曹操威德。勸遣子入侍。表大怒。以爲懷貳陳兵詬嵩。將斬之。嵩不爲動容。徐陳臨行之言。表妻蔡氏諫曰。韓嵩楚國之望也。且其言直。誅之無辭。表猶怒。乃考殺從行者。知無他意。但囚嵩而已。表貌儒雅而中疑忌。皆此類也。六年。昭烈去袁紹來荊州。表厚相待結。而不能用也。十一年冬。曹操征烏桓。昭烈說表襲許。表不從。原注。漢晉春秋曰。太祖之始征柳城。劉備說表使襲許。表不從。及太祖還。謂備曰。不用君言。故失此大會也。備曰。今天下分裂。日尋干戈。事會之來。豈有終極乎。若能應之於後者。則此未足爲恨也。十三年。曹操自將征表。未至八月。表疽發背卒。表在荊州幾二十年。家無餘積。二子琦、琮。表初以琦貌類己。甚愛之。後爲琮娶。其後妻蔡氏之姪。蔡氏遂愛琮而惡琦。毀譽之言。日聞於表。又妻弟蔡瑁及外甥張允並得幸於表。而睦於琮。琦不自寧。嘗與鄒、魯諸葛亮謀自安之術。亮初不對。後將亮游觀花園飲宴。因共升高

樓令去梯，謂亮曰：今日上不至天下，不至地。言出子口而入吾耳，可以言未。亮曰：君不見申生在內而危，重耳居外而安乎？原注·左氏傳·晉獻公嬖驪姬，使太子申生居曲沃，夷吾居屈，重耳居蒲。及驪姬誣殺申生，重耳出奔狄，在外十九年，而得晉國，是爲文公。琦意感悟，陰規出計，會表將江夏太守黃祖爲孫權所殺，琦遂求代其任。及表病甚，琦歸省疾。琦素慈孝，允等恐其見表而父子相感，更有託後意，乃謂琦曰：將軍命君撫臨江夏，其任甚重。今釋衆擅來，必見譴怒，傷親之歡，重增其疾。非孝敬之道也。遂遏於戶外，使不得見。琦流涕而去。衆聞而傷焉。遂以琦嗣，琦以侯印授琦。琦怒投之地，將因奔喪作難。會曹操軍至新野，琦走江南，蒯越及東曹掾傅巽等說琦迎操降。琦曰：今與諸君據全楚之地，守先君之業，以觀天下，何爲不可乎？巽對曰：逆順有大體，強弱有定勢。以人臣而拒人主，逆也。以新造之楚而禦國家，其勢弗當也。以劉備而敵曹操，又弗當也。三者皆短，欲以抗王兵之鋒，必亡之道也。將軍自料何與劉備？琮曰：吾不若也。巽曰：誠以劉備不足禦曹操乎？則雖保楚地，不足以自存也。誠以劉備足以禦曹操乎？則備不爲將軍下也。願將軍勿疑。原注·案獻帝建安十三年八月，蒯越等說劉琮降。范書陳志表傳皆云：韓嵩亦說琮降。嵩時被囚，必不預謀。操軍至襄陽，琮舉州降。昭烈走夏口。琮將王威說琮曰：曹操旣得將軍降，劉備已走，必懈弛無備。若給威兵數千，徼之於險，出其不意，操可禽也。禽操則威震四海，坐而虎步中夏，雖廣可傳檄而定，非徒收一勝之功，保今日而已。此難遇之機，不可失也。琮不聽。操以琮爲青州刺史，封列侯。原注·魏武故事載令曰：楚有江漢，山川之險，後服先強，與秦爭衡。

荊州則其故地。劉鎮南久用其民矣。身沒之後，諸子鼎峙，雖終難全，猶可引日。青州刺史琮，心高志潔，智深慮廣，輕榮重義，薄利厚德，蔑萬里之榮，忽三軍之衆，篤中正之禮，敦令名之譽，上耀先君之遺塵，下圖不朽之餘祚。鮑永

之棄井州。竇融之離五郡。未足以喻也。雖封列侯。一州之位。猶恨此寵未副其人。而比有牋求還州。監史雖尊。秩祿未優。今聽所執。表琮爲諫議大夫。參同軍事。後漢書。荊越等侯者十五人。乃釋嵩之囚。以其名重。甚加禮待。使條品州人優劣。皆擢而用之。以嵩爲大鴻臚。以交友禮待之。荊越光祿勳。劉先尚書令。初表之結袁紹也。治中從事鄧羲諫。不聽。羲以疾退。終表世不仕。操以爲侍中。其餘多至大官。操後敗於赤壁。昭烈表琦爲荊州刺史。明年卒。建安初。荊童謠曰。八九年始欲衰。至十三年無子遺。自中興以來。荊州獨全。及表爲牧。民又豐樂。至建安八年九月。表妻死。諸將亦皆淪謝。十三年。表卒。因喪破滅。皆如其數。比表卒。華容有女子忽啼呼云。荊州將有大喪。言語過差。縣以爲妖言。繫獄月餘。忽於獄中哭曰。劉荊州今日死。華容去州數百里。卽遣馬吏驗視。而表果死。縣乃出之。續又歌吟曰。不意李立爲貴人。無幾。操平荊州。以涿郡李立爲荊州刺史。蒯越、蒯通之後也。深中足智。儀狀魁傑。大將軍何進聞其名。辟爲東曹掾。越勸進誅諸閹官。進猶預不決。越知進必敗。求出爲汝陽令。佐劉表平定境內。詔拜章陵太守。封樊亭侯。曹操入荊州。表爲光祿勳。與荀彧書曰。不喜得荊州。喜得蒯異度耳。建安十九年。臨終。與操書。託以門戶。操書報曰。死者反生。生者不愧。孤少所舉行之多矣。魂而有靈。亦將聞孤此言也。韓嵩字德高。義陽人。少好學。貧不改操。知世將亂。不應三公辟命。與同好數人隱居於鄆西山中。黃巾起。嵩避難南方。劉表逼爲別駕。轉從事中郎。表郊祀天地。嵩諫不從。漸見違忤。及自許還。囚之。曹操入荊州。釋嵩囚。待以交友之禮。使條品州人優劣。皆擢用之。拜大鴻臚。卒。劉先字始宗。博學強記。尤好黃老。言明習漢家典故。爲劉表別駕。奉章詣許。見曹操時賓客並會。操問先。劉牧如何。郊祀天地。先對曰。劉牧託漢室肺腑處。牧伯之位。而遭王道未

平羣凶塞路抱玉帛而無所聘類修章表而不獲達御是以郊天祀地昭告赤誠操曰羣凶爲誰先曰舉目皆是操曰今孤有熊熊之士步騎十萬奉辭伐罪誰敢不服先曰漢道陵遲羣生憔悴旣無忠義之士翼戴天子綏寧海內使萬方歸德而阻兵安忍曰莫已若卽蚩尤智伯復見於今也操默然拜先武陵太守操入荊州以先爲漢尙書尋以爲魏國尙書令卒傳巽字公悌瓌偉博達有知人鑒辟公府拜尙書郎後客荊州以說劉琮之功賜爵關內侯曹丕時爲侍中太和中卒巽在荊州目龐統爲半英雄證裴潛終以清行顯統後輔昭烈見待次於諸葛亮潛位至尙書令並有名德及在魏朝魏諷以才智聞巽謂之必反卒如其言巽弟子嘏別有傳王儻字子文汝南人也少爲范滂許章所識與南陽岑晊善曹操爲布衣特愛儻儻亦稱操有治世之具及袁紹與弟術喪母歸葬汝南儻與操會之會者三萬餘人操密語儻曰天下將亂爲亂魁者必此二人也欲濟天下爲百姓請命不先誅此二子亂今作矣儻曰如卿之言濟天下者舍卿復誰相對而笑儻爲人外靜而內明不應州郡三府之命公車徵不至避地武陵歸儻者百餘家天子都許徵爲尙書又不就劉表見紹強陰與紹通儻謂表曰曹操天下之雄也必能興霸業繼桓文之功今乃釋近就遠如有一朝之急遙望河北之救不亦難乎表不從卒於武陵年六十四操入荊州自臨江迎喪改葬於江陵

議曰表據荆楚襟帶江漢瞰臨許雒向從昭烈之言勤王蹙操則漢未遽亡也亦優游自喜陰蓄異志乃

謂劉焉在蜀如子夏之在西河曾不知已之題旌夏奠玉器有甚於焉其坐談西伯亦猶隗囂之在隴也。

原注·左氏傳·宋公享晉侯於楚丘·請以桑林舞師題以旌夏·晉侯懼而退入於房·去旌·卒享而還·杜預注曰·桑林殷天子樂名·旌夏·大旌也·玉舞·郊禖玉爵也·後漢書·隗囂·自飾常以爲西伯復作·乃與諸將議自立爲王·昭烈託足無所表幾不容·琮琦之亂不取哭墓而去·當陽長阪之急棄妻子而不忍棄荊州之民·嗚呼仁哉·贊曰·焉殺漢使·墮剝維城·璋尤庸闇·遷奪猶輕·驅除庸蜀·赫我王靈·懿哉幽州·乃心帝室·奔命奉章·隕身碎璧·氣躉箕尾·天津尚赤·原注·幽州尾箕之次·析木之津·繇亦宗英·才匪戡難·乃啓孫氏·三辰肇判·遂俾昭烈·卒莫完漢表·有全楚·坐收天命·會弗衷·得死爲幸·

續後漢書卷第六

列傳第三

漢臣

義例曰。漢室之禍。始於黃巾。中于董卓。終于曹操。歷靈獻二帝而後天下三分。當時將相大臣與一時僭僞。或終于漢。或終于魏。或終于吳。皆故漢臣也。故自皇甫嵩至徐庶乃亡漢臣僚。自諸葛亮至鄒正乃恢復臣僚。總爲漢臣云。

皇甫嵩 朱雋 蓋勳

謹案此卷傳文全闕。惟存郝經議一篇。其贊語亦闕。

議曰。嗚呼。國之將亡。必有以兆亂。發於意慮之所不及。東都之季。所以爲亂本者。母后也。外戚也。宦官也。大臣也。及其始禍。乃在一妖賊張角。同日閼起。至數十萬。橫潰天下。雖嵩、雋仗鉞獮雍。原注。上鮮下替。一時豪傑。怙亂植兵。爲背脇疽根。而不可去。卒之孫氏曹氏。據有天下十之八。使昭烈奔走一隅。竟不能完漢。蓋綱紀者國之元氣也。母后外戚宦官大臣更蠹迭壞。國病已成。一旦潰而爲桀逆所制。不能以功名終。勳西州義士。烈望高出一時。奮辭抗議。爲卓所憚。不能靖難。銜憤而死。棟折榱崩。自是而漢亡矣。

續後漢書卷第七

列傳第四

漢臣

何進弟苗 鄭泰 何容 程劭 王允

王宏
趙岱

土孫瑞

謹案何進鄭泰何容三傳闕

程劭字申甫，拂之子也。祖嵩，延熹初爲司徒。大著名節。父拂，初平元年代荀爽爲司空。李傕、郭汜陷長安，百官多避兵。拂揮劍而出曰：「爲國大臣，不能止戈除暴，致使凶賊兵刃向宮，去欲何之？」遂戰而死。劭早知名，中平末爲諫議大夫。大將軍何進誅宦官，召并州牧董卓至澠池，而進意更狐疑，遣劭宣詔止之。卓不受，遂前至河南。劭迎勞之，因譬令還車。卓疑有變，使其軍士以兵脇劭。劭怒，稱詔大呼呵之，軍士皆披。遂前斥卓，卓辭屈，乃還軍夕陽亭。及進敗，獻帝卽位，拜劭侍中。卓旣擅權，而惡劭強力，遂左轉議郎。出爲益涼二州刺史。會父拂戰死，竟不之職。服終，徵爲少府。大鴻臚皆辭不受。曰：「昔我先人以身殉國，吾爲臣子，不能除殘復怨，何面目覲明主哉？」遂與馬騰、韓遂及左中郎劉範、諫議大夫馬宇共攻催汜，以報其仇。戰於長平觀下，軍敗，死之。

議曰。戚宦並爲亂本。耦傷漢室久矣。一旦更相屠并。必兩斃而後已。理勢然也。故竇武何進倚母后恃元舅。握兵柄。操大權。總攬豪傑。登庸名士。欲蠶除閹穢。卒之身死而族滅。以亂除亂。神明不與也。進復懷諫違衆。卒召外寇。疣潰身殫。遂淪鼎命。悲夫。鄭泰之止進召卓。不用而去。可謂見機而作也。及與何容發山東之謀。祇爲亂階。亦猶進之召卓也。容卒以憂死。泰可謂幸而免矣。國之將亡。殆如膏肓之疾。動之死地。雖雷扁和秦。

原注·雷公·扁鵲醫和·秦越人

莫能善其術也。种劭父子死國。烈氣凜凜。爲不死矣。

謹案目錄王允傳附王宏、士孫瑞、趙戩、今止存趙戩一篇。其王允、王宏、士孫瑞傳文俱闕。

趙戩字叔茂。長陵人性質正多謀。初平中爲尙書典選舉。董卓數欲有所私授。戩輒拒不聽。言色強厲。卓怒。將殺之。衆爲悚慄。而戩自若。卓悔。謝釋之。旣收葬允三輔。大亂客於荊州。劉表厚禮焉。及曹操平荊州。辟爲掾。後爲五官將司馬。相國鍾繇長史。年六十餘卒。初昭烈襲蜀。戩曰。劉備其不濟乎。拙於用兵。每戰則敗。奔亡不暇。何以圖人。蜀雖小區險固四塞。獨守之國難。卒并也。徵士傅幹曰。劉備寬仁有度。能得人死力。諸葛亮達治知變。正而有謀。而爲之相關羽忠義。張飛勇而有義。皆萬人之敵。而爲之將。此三人者。皆人傑也。以備之略。三傑佐之。何爲不濟。卒如幹言。原注·蔚宗論曰。士雖以正立。亦以謀濟。若王允之推董卓。而不爲苟冒。伺間不爲狙詐。及其謀濟意從。則歸成於正也。分

議曰。嘗觀燕將之射虎。遂巡辟易。怒則鞭馬而去。視其便利。以矢殪之。王允之圖卓。射虎之術也。方其咆

嘵肉人不置則縱令足厭一旦置之机上若剗羊豕然宮闈不駭而清大慤可與語權矣故議者謂推卓不爲失正分權不爲苟冒伺間不爲狙詐然昧夫泰定包荒之義原注·泰·九遂成屯難大貞之凶原注·屯大貞凶曰使催汜犯順臘火未冷又生數十百卓身死而不能衛君向之權盡爲今之迂矣士孫歸功不原注·謙·九三侯有勞謙之吉原注·謙君子有終吉保身之智卒爲亂兵所殺崑山之烈玉石俱焚吁可畏哉

贊曰進本屠割馮藉椒掖智小謀大身夷族赤自我致寇死有餘責公業諸賢匡時濟難龍蛇閨起漫爲興歎奔命脫死亟走解散尤篤智計漢火復然臘炷未滅頸刀遽連明哲保身士孫獨賢終亦不免衆果勝天

續後漢書卷第八

列傳第五

漢臣

董卓

李傕
樊稠

郭汜

張濟

李樂

楊奉

韓暹

胡才

韓遂

馬騰
闡行

成公英

張楊

董承

呂布

張邈
高順

邈弟超

陳宮

謹案董卓傳闕

韓遂字文約。與同郡邊章俱著名西州。章爲督軍從事。遣遂奉計詣京師。大將軍何進聞其名。請與相見。遂說進誅諸閹人。進不從。乃求歸。及北宮伯玉等反。劫章。遂爲謀主。遂因殺伯玉及章。與馬騰合。馬騰者。字壽成。右扶風茂陵人。伏波將軍援之後也。其父謹案後漢書注。父平。蜀志注字子碩。嘗爲天水蘭干尉。後失官。因留隴西。與羌錯居。娶羌女生。騰。騰少貧。嘗從鄣山斬材木。負販自給。騰身長八尺餘。軀幹洪壯。面鼻雄異。而性仁厚。人多敬愛之。涼州募民有勇力者。謹案陳志馬超傳注。王國等及氐羌反叛。州郡募發民有勇力者。騰應募。耿鄙見而異之。署爲軍事典領部曲。討賊有功。遷軍司馬。拜偏將軍。及與遂合。勇常冠軍。遂騰之敗於長平觀。而走涼州也。遂還金城。騰屯汧隴間。時西州少穀。騰表言軍人乏食。求就穀池陽。遂移屯長平岸頭。池陽將王承等恐騰爲害。乃攻騰營。騰適出無備。遂破走西上。會三輔亂。不復東。與韓遂結爲異姓兄弟。甚相親厚。後以部曲相侵入。

更爲讐敵。騰攻遂。遂走。合衆還攻騰。殺騰妻子。連兵不釋。下隴戰關中。建安七年。曹操欲圖呂布。恐袁紹侵擾關中。西亂羌胡。乃使司隸校尉鍾繇。涼州牧韋瑞和解之。繇移書遂。騰爲陳禍福。騰遂各釋兵。遣子入侍。乃拜騰征南將軍。遂征西將軍。並開府。袁尚遣高幹、郭援將兵數萬與匈奴單于寇河東。遣使連和。遂騰。騰陰許之。繇乃使傅幹說騰曰。古人有言。順道者昌。逆德者亡。曹公奉天子。誅暴亂。法明國治。上下用命。有義必賞。無義必罰。可謂順道矣。袁氏背王命。驅胡寇以陵中國。寬而多忌。仁而無斷。兵雖強實失天下心。可謂逆德矣。今將軍旣事有道。不盡其力。陰懷兩端。欲以坐觀成敗。事定奉辭責罪。將軍爲誅首矣。於是騰懼。幹曰。智者轉禍爲福。今曹氏與袁氏相持。而高幹、郭援獨制河東。曹公雖有萬全之計。不能禁河東之不危也。將軍誠能引兵討援。內外擊之。其勢必舉。是將軍一舉斷袁氏之臂。解一方之急。曹公必重德。將軍功名竹帛。不能盡載也。惟將軍審所擇。騰曰。敬從教。於是遣子超將精兵萬餘人與繇會。擊援。大破之。操乃徵騰入屯槐里。轉拜前將軍。假節。封槐里侯。北備胡寇。東備白騎。騰進賢待士。矜救民命。撫存瘡痍。三輔安之。曹操將伐荊州。復使張既說騰。令釋部曲入宿衛。騰許之。已而更猶豫。旣恐其爲變。乃移諸縣。促儲侍二千石郊迎。騰不得已。發東。操表騰爲衛尉。以超爲偏將軍。領騰營。又拜超弟休爲奉車都尉。休弟鐵騎都尉。徙其家屬皆詣鄴。惟超獨留。十六年。曹操遣夏侯淵會鍾繇討張魯。關中諸將疑爲襲已。超與韓遂等十部皆反。東扼潼關。據有關中。曹操親征。以譎計間超。遂使相疑。因擊遂等。大

破之操軍還誅騰夷三族超復與遂破隴上諸郡超敗奔漢中復出遂復與之圍祁山超復敗走夏侯淵追遂至於略陽攻燒長離羌屯遂救長離淵邀擊大破之遂以餘衆遯歸金城建安二十年曹操征張魯至河池西平金城諸將麴演蔣石等共斬遂送首於操遂自靈帝末始亂積三十二年至是乃死年七十餘矣初隴西人宋建在枹罕自稱河首平漢王置百官亦三十餘年曹操遣夏侯淵擊建斬之涼州悉平成公英者金城人中平末隨韓遂謀議軍事建安中遂自華陰破走還湟中部黨散去惟英獨從其壻閻行欲殺遂以降夜攻遂不克遂歎曰丈夫困厄禍起婚姻乎謂英曰今親戚離叛人衆轉少當從羌中西南詣蜀耳英曰舉事數十年今雖罷敗何有自棄巢窟而依人乎遂曰吾老矣子欲何施英曰曹公不能遠來獨夏侯耳夏侯之衆不足以追我又不能久留且息肩於羌中以須其去招呼故人綏會羌胡猶有可爲也遂從其言時衆尚數千人遂宿有恩於羌胡羌胡衛護之及夏侯淵還使閻行留後乃合羌胡數萬將攻行行欲走會遂死英降操操見之甚喜以爲軍師封列侯從行出獵有三鹿過前操命射之三發皆中應弦而斃操抵掌笑曰但韓文約可爲盡節而孤獨不可乎英下馬跪曰不欺明公假使英主人在實不來也遂流涕哽噎操嘉其忠益親敬之魏黃初時河西復亂遣英佐涼州平隴右病卒閻行者金城人後名豔字彥明少有健名爲韓遂裨將建安初遂與馬騰相攻擊騰子超亦以勇稱行嘗刺超矛折因以折矛搘超幾殺之十四年遂使詣曹操操厚遇之表拜犍爲太守行因請令其父入宿衛西還見遂達

操旨云謝文約卿始起兵時自有所逼我所具明也今當共匡輔國朝行因謂遂曰將軍興軍以來三十餘年民兵疲瘁所處又狹宜早有所附是以前在鄴自啓當令老父詣京師誠謂將軍亦宜遣一子以示丹赤遂曰且可復觀望數歲後遂遣其子與行父母俱東會遂西討張猛留守舊營而馬超等反舉遂爲都督及遂還超謂遂曰前鍾司隸任超使取將軍關東人不可復信也今超棄父以將軍爲父將軍亦當棄子以超爲子行諫遂不欲令與超合遂謂行曰今諸將不謀而同似有天數乃東詣華陰及曹操與遂交馬語行在其後操謂行曰當念作孝子及超等破走行隨遂還金城操聞行前意故但誅遂子孫在京師者手書與行曰觀文約所爲使人笑來吾前後與書無所不說如此何可復忍卿父諫議自平安也雖然牢獄之中非養親之處且又官家亦不能久爲人養老也遂聞行父獨在欲使并遇害乃強以少女妻行行不獲已納之操果疑行會遂使行別領西平郡乃勒其部曲攻遂不勝將家人東奔操操表封列侯

謹案目錄此下有張楊傳今闕止存附傳董承一篇

董承靈帝母永樂太后之姪獻帝之舅也旣召曹操遷於許以承爲車騎將軍開府自都許之後權歸曹氏天子總己百官備員而已帝不勝操專偪置密詔衣帶中付承令與昭烈結天下義士共誅操未發操遣昭烈東征袁術承更與偏將軍王服謀曰郭多有數百兵壞李傕數萬人顧足下與吾同否昔呂不韋

之門須子楚而後高今吾與子猶是也

原注史記秦子楚爲質于趙呂不韋說曰吾能大子之門子楚笑曰且自大君之門而乃大吾門呂不韋曰子不知也吾門待子門而大不韋

入秦說華陽夫人立子楚是爲莊襄王以不韋爲丞相始皇立還不韋于蜀伏燭而死

服惶懼不敢當且曰兵少耳承曰舉事訖得操成兵顧豈少耶

今長水校尉种輯議郎吳碩吾腹心辦事者遂與服及輯碩決計事覺承等皆爲操所誅夷三族

謹案目錄此下有呂布傳今闕

議曰卓爲羿莽而姦計不足其暴戾淫虐過之是以遽起而遽滅適足以貽禍而資羣盜遂使兇孽蠭輩刺天肆獮賈怒鴟奪豨呀劫質天子囚戮公卿折井頓擲盪耗漢家神靈澌熄銷沒而後各就誅夷自昔國亡驅除之際未有若斯之亂且酷也韓遂馬騰跳踉河右坌起始亂聚散不常梗踣關輔三十餘年軼勝廣矣原注漢書陳勝字涉陽城人吳廣字叔陽夏人也二世元年發閭左戍漁陽勝廣皆爲屯長行至蘄大澤鄉與其徒屬殺將尉袒右稱大楚勝自立爲將軍廣爲都尉入據陳勝乃立爲王廣爲假王張楊有奉迎之功據河山之郡而無雄才卒墮匹夫之手智不足稱也董承無何進之力又無王允之術幾事不密反爲操所圖遂使昭烈去而不復王室無所依賴操乃窮兇極狠仇怨天子齧血禁籞踰齒宮闈怒而不置詩曰無拳無勇職爲亂階承之謂也呂布翻覆虓猛而不知義至于禽戮乞解縛自效豈天也哉昭烈當屯難之際屈身于布以貴下賤及其禽布健決誅之奮其乾剛盡龍德飛潛之義矣贊曰召戎啓釁運極厄會祲塞風饕虎躍鯨沛逆鉄淬日兇鋒掃空翻覆宗社廢立君主血饑咸京金盈郿塢巖巖公師烈烈尙父雖伏天誅竟委皇綱梟振蠭圍紛紜寇場乾坤榛蕪王猷允亡楊雖有功承實

不智遂敢首禍。布弗知義。共爲妖孽。穢我神器。

續後漢書卷第九

列傳第六

漢臣

袁紹子譚
審配
熙尚
從兄遠
田豐
麴義
李孚
王修

袁術

袁紹上

袁紹字本初。汝南汝陽人。自司徒安四世居三公位。由是勢傾天下。紹司徒湯之孫。司空逢之庶孽也。出後伯父五官中郎將成。原注·後漢書·安字邵公·祖父良·習孟氏易·安傳良學·舉孝廉·除陰平長·永平十三年楚王英謀逆。下郡覆考。三府舉安能理劇。拜楚郡太守。治楚獄。所伸理者四百餘家。徵爲河南尹。遷太僕。元和三年拜司空。章和元年代桓熲爲司徒。時天子幼弱。外戚擅權。每朝會進見。及與公卿言。家事未嘗不噫嗁流涕。自天子及大臣皆倚賴之。四年薨。子敞。字叔平。安帝元初二年代劉愷爲司空。安孫湯。字仲河。桓帝初爲司空。累遷司徒。太尉。湯次子達。字周陽。獻帝時爲司空。達弟隗。字次陽。獻帝初太傅。爲董卓所害。魏書。自安以下。皆博愛容衆。無所揀擇。賓客入其門。無賢愚皆得所欲。爲天下所歸。紹即達之庶子。術異母兄也。出後成爲子。英雄記。成字文開。壯健有部分。貴戚權豪自大將軍梁冀以下。皆與結好。言無不從。故京師爲作諺曰。事不諧。問文開。少爲郎。弱冠除濮陽長。早喪其父。及遭母喪。去官三年。喪畢。追感幼孤。再服父服。凡廬墓六年。紹壯健有威容。旣累世台輔。豪傑歸仰。加傾心折節。莫不奔走。友曹操傾慕。亦內交焉。於是聲望甚盛。及徙居雒陽。不妄通賓客。養名自重。非海內知名不得相見。

睥睨權倖不應辟命

原注・英雄記・紹隱居雒陽・不妄通賓客・非海內知名・不得相見・又好遊俠・與張孟卓・何伯求・吳子卿・許子遠・伍德瑜等皆爲奔走之友・不應辟命・裴松之曰・案魏書云・紹・逢之庶子・出後伯父成・如此記所言・則似實成所生・夫人追服所生・禮無其文・況于所後而可以行之・二書未詳孰是

聲價不應呼召好養死士不知此兒欲何所爲乎紹叔父太傅隗聞之責數紹曰汝不改行而與時偕且

破我家始辟大將軍何進掾爲侍御史遷虎賁中郎將中平五年初置西園八校尉以紹爲中軍校尉

原注・後漢書作佐軍校尉・靈帝崩少帝卽位紹使客張津說何進曰黃門常侍秉權日久又永樂太后與諸常侍專通財

利將軍宜整頓天下爲海內除患進以爲然遂與紹謀誅閹官及蹇碩令趙忠圖進事覺誅碩紹說進曰

碩旣伏誅不盡滅其黨必爲後患今大行在前殿將軍以詔書領兵衛守可勿入宮進納其言後更狐疑

紹脅進曰今釁構已成形勢已露將軍不早決之事留變生後機禍至復爲竇氏矣進乃白太后太后不

從乃召董卓欲以脅太后黃門常侍聞之皆詣進謝惟所錯置紹勸進便可於此決之至再三進不許轉

紹司隸校尉假節專命擊斷紹使雒陽方略武吏檢司諸宦者又令紹從弟虎賁中郎將術選溫厚虎賁

二百人入禁中代持兵黃門陞守門戶中常侍段珪等矯太后命召進入殺之宮中亂術將虎賁燒南宮

嘉德殿青瑣門欲迫出珪等珪等不出劫帝及陳留王走小平津紹旣殺宦者所署司隸校尉許相又捕

趙忠等斬之原注・山陽公載記・紹與王匡等并力入端門・遂于承明堂上格殺中常侍高望等三人

乃閉北宮門勒兵捕諸閹宦無少長皆殺之急追珪等悉赴河死帝得還宮董卓將兵至騎都尉泰山鮑信說紹曰董卓擁制強兵累拒詔命今乘亂而入將

有異志。若不早圖。必爲所制。及其新至。罷勞襲之可禽也。紹畏卓。不敢發。頃之。卓議欲廢立。謂紹曰。天下之主。宜得賢明。每念靈帝令人憤毒。董侯似可。今欲立之。爲能勝史侯否。人有小智大或癡。亦知復何如。爲當且爾。紹曰。漢家君天下四百許年。恩澤深渥。兆民戴之。今上富于春秋。未有失德。聞于天下。公欲廢嫡立庶。恐衆不從。公議也。卓按劍叱紹曰。豎子敢然。天下事豈不在我。我欲爲之。誰敢不從。紹詭對曰。此國家大事。請出與太傅議。卓復曰。劉氏種不足復遺。紹勃然曰。天下健者。豈惟董公。橫刀長揖。徑出縣節于上東門而奔冀州。原注·英雄記·紹揖卓去·坐中驚愕·卓新至·見紹大家·故不敢害·山陽公載記·卓以袁紹棄節·改第一葆爲赤旄·裴松之曰·紹于時與卓未構嫌隙·故卓與之譖謀·若但以言議不同·便罵爲豎子·而有推刃之心·及紹復答·佩強爲甚·卓又安能容忍而不加害乎·且如紹此言·進非亮正·退違詭遜·而顯其競爽之旨·以觸畔闕之鋒·有志功業者·理豈然哉·此語妄之甚矣·時卓暴戾·氣凌一時·決計廢立而紹忤之·故致忿罵·紹亦一世之傑·氣自蓋卓·揖之而去·亦其宜也·是不爲妄·故今取之。卓旣廢帝立陳留王。購紹急。侍中周珌謹案·陳志·珌作毖急。城門校尉伍瓊、議郎何容等爲卓信待。而陰爲紹地說。卓曰。夫廢立大事。非常人所及。紹不達大體。恐懼故出奔。非有他志也。今購之急。勢必爲變。袁氏樹恩四世。門生故吏。徧於天下。若收豪傑以聚徒衆。英雄因之而起。則山東非公有也。不如赦之。拜一郡守。紹喜於免罪。必無患矣。卓以爲然。乃拜紹渤海太守。封鄃原注·漢反·同鄉侯。紹猶稱兼司隸。初平元年。紹遂以渤海起兵。與後將軍術、冀州牧韓馥、豫州刺史孔仙、兗州刺史劉岱、陳留太守張邈、廣陵太守張超、河內太守袁遺、東郡太守橋瑁原注·英雄記·瑁字元偉·元族子·先爲兗州刺史·甚有威、濟北相。據後漢書改。鮑信等十郡守。相同時俱起。衆各數萬。以討董卓爲名。紹與王匡屯河內。仙屯惠。

潁川馥屯鄴邈岱瑁遺咸屯酸棗共約盟誓推紹爲盟主紹自號車騎將軍領司隸校尉卓聞紹起兵乃誅其叔父太傅隗及太僕基使司隸宣璠收袁氏宗族在京師者尺口以上皆殺之原注·卓別傳·悉埋青焉·又恐有盜取者·復以屍送鄆藏之既而卓脅遷車駕西幸長安卓留據雒陽焚燒宮室發掘陵寢獨長沙太守孫堅與卓戰屢破之紹等皆畏卓莫敢先進諸軍十餘萬列營酸棗日置酒高會曹操爲陳計策不從引兵與卓將徐榮戰不利詣揚州募兵紹還屯河內諸軍食盡衆散卓遣少府陰修等譬喻諸將使罷兵紹等各執其使殺之是時豪傑多附紹且感其家禍人思爲報州郡蠭起莫不以袁氏爲名韓馥見豪傑歸心於紹忌其得衆恐將圖己遣從事守紹門不聽發兵橋瑁乃詐作三公遺書傳驛州郡說董卓罪惡天子危逼企望義兵以釋國難馥方聽紹舉兵而謀于衆曰助袁氏乎助董氏乎治中劉惠勃然曰興兵爲國安問袁董冀州於他州不爲弱也兵者凶事不可爲首今宜視他州有發動者然後和之未晚也劉岱遺馥書曰董卓無道天下所共攻死在旦暮但卓死之後當回師討文節爾擁強兵阿凶逆寧可得置馥大懼歸咎于惠將殺之從事耿武排闥伏惠上願并見斬得不死作徒被赭衣掃除劉岱與橋瑁相惡岱殺瑁以王肱領東郡太守自是山東州郡互相吞滅不復謀討卓矣初青州刺史焦和亦起兵討卓與諸將西行不爲民人保障甫濟河黃巾已入其境青州素殷實甲兵甚盛和每望寇奔北未嘗接風塵交旗鼓也性好卜筮信鬼神入見其人清談干雲出觀其政賞罰清亂州遂蕭條悉爲丘墟和病卒紹使臧洪領青州以撫

之二年紹與山東諸將議立幽州牧劉虞爲帝遣使奉章詣虞虞拒不受張楊自上黨率衆數千歸紹紹使與南單于於扶羅屯漳水韓馥意益深疑于紹陰貶節其軍糧欲使其衆離散會馥將麴義叛馥與戰而敗紹因與義相結紹客逢原注音龐紀謂紹曰將軍舉大事而仰人資給不據一州無以自全紹曰冀州

音龐

兵強吾士饑乏設不能辦無所容立紀曰韓馥庸才可密要公孫瓚使取冀州馥必駭懼因遣辨士爲陳

禍福迫于倉卒必自遜讓可因據其位紹然之卽以書與瓚瓚遂引兵而至外託討董卓而陰謀襲馥馥與戰不利會董卓入關紹還軍延津使外甥陳留高幹原注武秀出父躬蜀郡太守祖賜司隸校尉謝承書幹字元才才志宏逸文及馥所親穎

川辛評荀諶郭圖等說馥曰公孫瓚將燕代之卒乘勝南來而諸郡應之其鋒不可當袁車騎引軍東向其意不可量也竊爲將軍危之馥懼曰然則爲之柰何諶曰君自料寬仁容衆爲天下所附孰與袁氏馥曰不如也臨危吐決智勇過人又孰與袁氏馥曰不如也世布恩德天下家受其惠又孰與袁氏馥曰不如也諶曰袁氏一時之傑將軍資三不如之勢久處其上彼必不爲將軍下也夫冀州天下之重資也彼若與公孫瓚并力取之危亡可立待也夫袁氏將軍之舊且爲同盟當今之計莫若舉冀州以讓袁氏彼必厚德將軍瓚亦不能與之爭矣是將軍有讓賢之名而身安于泰山也馥性恇怯因然其計長史耿武別駕閔純治中李歷譁案後漢書作騎都尉沮授此作治中李歷從魏志也聞而諫曰冀州帶甲百萬穀支十年袁紹孤客窮軍仰我鼻息譬如嬰兒在股掌之上絕其哺乳立可餓殺柰何欲以州與之馥曰吾袁氏故吏且才不如本初度

德而讓。古人所貴。諸君獨何病焉。先是。馥從事趙浮。程奐將強弩萬張屯孟津。聞之率兵馳還。時紹在朝。歌清水浮等從後來。船數百艘。衆萬餘人。整兵鼓夜過紹營。紹甚惡之。浮等到謂馥曰。袁本初軍無斗糧。各已離散。雖有張楊於扶羅。新附未肯爲用。不足敵也。浮等請自以見兵拒之。旬日之間。必土崩瓦解。明將軍但當開閣高枕。何憂何懼。馥又不聽。乃避位出居中常侍趙忠故舍。遣子送印綬以讓紹。紹將至。從事十人爭棄馥去。獨耿武閔純杖刀拒之。不能禁。乃止。紹皆殺之。紹遂領冀州牧。承制以馥爲奮威將軍。使監護諸將。遇甚厚。而實無所領御。引廣平沮授爲別駕。因謂授曰。今賊臣作亂。朝廷播遷。吾歷世受寵。志竭力命。興復漢室。然齊桓非夷吾不能成霸。勾踐非范蠡無以存國。今欲與君戮力同心。共安社稷。將何以匡濟之乎。授曰。將軍弱冠登朝。則播名海內。值廢立之際。則忠義奮發。單騎出奔。則董卓懷怖。濟河而北。則渤海稽首。振一郡之卒。撮冀州之衆。威震河朔。名重天下。雖黃巾猾亂。黑山跋扈。舉軍東向。則青州可定。還討黑山。則張燕可滅。回衆北首。則公孫必禽。震脅戎狄。則匈奴必從。橫大河之北。合四州之地。收英雄之才。擁百萬之衆。迎大駕于西京。復宗廟于雒邑。號令天下。誅討未服。以此爭鋒。誰能敵之。比及數年。其功不難。紹喜曰。此吾心也。卽表授爲監軍奮武將軍。原注·獻帝傳·授少有大志·多權略·任州別駕。尉袁紹得冀魏郡審配。原注·先賢行狀·配字正南·少忠烈慷慨·有不可犯之節·紹領冀州·委腹心之任·鉅鹿豐。原注·先賢行狀·豐字元皓·鉅鹿人·更云渤海人·豐天姿瓊傑·權略多奇·少喪親·居喪盡哀·日月雖過·笑不至矧·博覽多識·名重州黨·初辟太尉府·舉茂才·遷侍御史·閻官擅執·英賢被害·豐乃棄官歸家·袁紹起義·卑辭厚幣以招致豐·豐以王室多難·志存匡救·乃應紹命·以爲別駕·並以

正直不得志于馥。紹以豐爲別駕，配爲治中。及南陽許攸、逢紀、荀謁皆爲謀主。原注：英雄記。紀字元圖。初紹去董卓出奔，與許攸及紀俱

詣冀州。紹以紀聰達有計策，甚親信之。與共舉事。紹以河內朱漢爲都官從事。漢先爲韓馥所不禮，且欲邀迎紹意，擅發兵圍守

馥第，拔刀登屋。馥走上樓，收得馥大兒，搘折兩腳。紹立收漢殺之。馥猶憂怖，從紹索去，往依張邈。後紹遣使詣邈，有所計議，與邈耳語。馥在坐上，謂爲見圖，無何起至溷，以書刀自殺。公孫瓚大破青州黃巾于東光，還屯廣宗，威震河朔。時州郡務相兼并，以自強大。紹與術亦相離貳。術遣孫堅擊董卓，未返。紹以周昂爲豫州刺史，襲取堅陽城。堅還擊昂走之。術遣瓚弟越助堅攻昂，越爲流矢所中，死。瓚怒曰：「余弟死禍起于紹也。」遂出軍屯槃河上，疏數紹罪惡，進兵攻紹。冀州諸城望風響應。紹懼，以所佩渤海太守印綬授瓚，從弟範，遣之郡。而範遂去。紹領渤海兵助瓚。瓚乃自署其將帥爲青、冀、兗三州刺史，又悉改置郡縣守令。紹乃自出擊瓚。陳于界橋南二十里。瓚步兵三萬。謹案：兵三萬與後漢書合。陳志、英雄記俱作二萬。列爲方陣，騎萬匹，分爲左右兩翼。白馬義從爲中堅，亦分爲兩校。左射右，右射左。旌旗鎧甲，光照天地。紹令麴義以精兵八百爲先登，強弩千張夾承之。紹自以步兵數萬結陳于後。義久在涼州，曉習羌鬪，兵皆精銳。瓚輕其兵少，縱騎騰之，義兵皆伏楯下不動。未至數十步，同時俱起，揚塵大叫，直前衝突。強弩雷發，瓚軍大奔。臨陳斬瓚所置冀州刺史嚴綱獲甲首千餘級。追至界橋，瓚斂兵還戰。義復破之。遂到瓚營，拔其牙門。原注：真人水鏡經。凡軍始出，立牙竿，必令完堅。若有折，將軍不利。牙門旗竿，軍之精精也。卽周禮司常職云：軍旅會同置旗門是也。餘衆皆走。紹在後十數里見瓚已破，不復設備，發鞍息馬，帷帳

下強弩數十張大戟士百餘人。瓚散兵二千餘騎卒至圍紹數重亂矢雨下。田豐扶紹欲卻入空垣。紹以兜鍪撲地曰：「大丈夫當前鬪死而反逃牆垣間邪？」促使強弩競發多所殺傷。瓚騎不知爲紹頗稍引卻。會麴義來迎騎乃散去。紹振旅還鄴。三年，瓚又遣兵至龍湊挑戰。紹復擊破之。瓚遂還幽州不復出。紹乃與瓚所置青州刺史田楷連戰。士卒疲頓。遂以其子譚爲青州刺史。楷與戰不勝。四年，天子使太傅馬日碑、太僕趙岐和解關東。岐別詣河北。紹出迎于百里上拜奉朝命。岐住紹營遺書告瓚。瓚遣使與紹書曰：「趙太僕以周召之德銜命來征。宣揚朝恩示以和睦。曠若開雲見日。何喜如之！」昔賈復寇恂亦爭士卒欲相危害。世祖解紛乃俱陞見同輿共出。嫌難既釋時人美之。原注：後漢書。賈復部將殺人於潁川。寇恂戮之于市道。稱疾而還。帝乃徵恂。恂至引見時復先在坐。欲起相避。帝曰：「天下未定。兩虎安得私鬪。今日朕分之。」于是並出極歡。遂共車同出。結友而去。復以爲恥。還過潁川曰：「見恂必手劍之。恂出迎于市上。」原注：韓詩章句。鄭玄注。三月上巳。于溱洧兩水之上秉蘭祓除不祥。風俗通。周禮女巫掌歲時祓除疾病。禊者潔也。于水上盥潔也。已者祉也。邪疾已去。祈介祉也。歷法三月建辰己卯退除。可以拂除災也。聞魏郡兵反與黑山賊于毒共覆鄴城殺太守栗成賊十餘部衆數萬人會于鄴中坐客皆憂怖失色。紹自若也。原注：獻帝春秋。紹勤督引滿投壺。言笑容貌自若。

賢李大目于氏根等皆屠其屯壁遂與黑山賊張燕及四營屠各雁門烏桓戰于常山燕精兵數萬騎數千匹紹與連戰十餘日燕兵死傷雖多而紹軍亦疲憊遂俱退。麴義自恃有功驕縱不軌紹殺之而并其衆。初帝之立非紹意故欲立劉虞帝在長安竟不通問興平二年李傕等以紹雄據河朔威名日盛乃拜紹爲右將軍其冬車駕東還爲李傕所追於曹陽沮授說紹曰將軍累葉輔弼世濟忠義今朝廷播越宗廟毀壞觀諸州郡外託義兵內圖相滅未有勤王卹民者今州城麤定兵強士附西迎大駕卽宮鄭都挾天子以令諸侯畜士馬以討不庭誰能禦之紹悅將從之潁川郭圖原注九州春秋淳于瓊曰漢室凌遲爲日久矣今欲興之不亦難乎且英雄並起各據州郡連徒聚衆動有萬計所謂秦失其鹿先得者王今迎天子自近動輒表聞從之則權輕違之則拒命非計之善者授曰今迎朝廷至義也于事會大計也若不早圖必有先之者矣夫權不失幾功不厭速將軍其圖之紹竟不從以圖等言爲然原注陳志初天子之立非紹意及在

河東紹遺潁川郭圖使焉圖還說紹迎天子都鄴紹不從裴松之曰曹操圍張超於雍丘東郡太守臧洪從

案獻帝傳沮授書迎帝都鄴策而圖沮之此稱郭圖之計與傳違也

紹請兵救超紹不與操拔雍丘殺超洪絕紹不與通紹興兵圍之城陷執洪殺之建安元年帝至雒陽曹操迎帝都許盡收河南地關中皆附詔書下紹責以地廣兵多而專自樹黨不聞勤王之師紹上書曰臣聞昔有哀歎而霜隕悲哭而崩城者原注淮南子鄒衍事燕惠王盡忠左右謂之仰天而哭夏六月天爲降霜說苑齊莊公攻莒爲五乘之寶而杞梁獨不預歸而不食其母曰食汝生而無義死而無名則雖非五乘孰不汝笑生而有義死而有名則五乘之寶及與莒戰梁遂鬪殺二十七人而死妻聞而哭城爲之阨而隅爲之崩每讀其書謂爲信然於今

況之乃知妄作何者臣出身爲國破家立事至乃懷忠獲釁抱信見疑晝夜長吟剖肝泣血曾無崩城隕霜之應故鄒衍杞婦何能感徹臣以負薪之資拔於陪隸之中奉職憲臺擢授戎校常侍張讓等滔亂天常侵奪朝威賊害忠德扇動姦黨故大將軍何進忠國疾亂義心赫怒以臣頗有一介之節可責以鷹犬之功故授臣以督司諮臣以方略臣不敢畏憚強禦避禍求福與進合圖事無違異忠策未盡而元帥受敗太后被質宮室焚燒陛下聖德幼沖親遭尼困時進既被害師徒喪沮臣獨將家兵百餘人抽戈承明竦劍翼室虎叱羣司奮擊凶醜曾不浹辰罪人斯殄此誠愚臣效命之一驗也會董卓乘虛所圖不軌臣父兄親從並當大位不憚一室之禍苟惟寧國之義故遂解節出奔創謀河外時卓方貪結外援招悅英豪故卽臣渤海申以軍號則臣之與卓未有纖芥之嫌若使苟欲滑泥揚波偷榮求利則進可以享竊祿位退無門戶之患然臣愚所守志無傾奪故遂引會英雄興師百萬飲馬孟津歃血漳河會故冀州牧韓馥懷挾逆謀欲專權勢扼絕軍糧不得踵係至使猾虜肆毒害及一門尊卑大小同日并戮鳥獸之情猶知號呼臣所以蕩然忘哀貌無隱戚者誠以忠孝之節道不兩立顧私懷已不能全功斯亦愚臣破家徇國之二驗也又黃巾十萬焚燒青兗黑山張楊跋藉冀域臣乃旋師奉辭伐畔金鼓未震狡敵知亡故韓馥懷懼謝咎歸土張楊黑山同時乞降臣輒承制竊比竇融以議郎曹操權領兗州牧會公孫瓚師旅南馳陸掠北境臣卽星駕席卷與瓚父鋒假天之威每戰輒克臣備公族子弟生長京輦頗聞俎豆不習大

戈加自始祖先臣以來世作輔弼咸以文德盡忠得免罪戾臣非與瓊角戎馬之勢爭戰陳之功者騎數以賊臣不誅春秋所貶苟云利國專之不疑故冒踐霜雪不憚劬勤實庶一捷之福以立終身之功社稷未定臣誠恥之太僕趙岐銜命來征宣陛下含宏之施蠲除細故與下更新奉詔之日引師南轍是臣畏怖天威不敢怠慢之三驗也又臣所上將校率皆清英宿德令名顯達登鋒履刃死者過半勤恪之功不見書列而州郡牧守競盜聲名懷持二端優游顧望皆列土錫圭跨州連郡是以遠近狐疑議論紛錯者也臣聞守文之世德高者位尊倉卒之時功多者賞厚陛下播越非所離邑乏祀海內傷心志在憤惋是以忠臣肝腦塗地肌膚橫分而無悔心者義之所感故也今賞加無勞以攜有德杜黜忠功以疑衆望斯豈腹心之遠圖將乃讒慝之邪說使之然也臣爵爲通侯位二千石殊恩厚德臣旣叨之豈敢闕覬重禮以希形弓旅矢之命哉

原注·左氏傳·王命尹氏策命晉侯爲侯伯·賜之大路之服·形弓一·形矢百·旅弓十·旅矢千·

誠傷偏裨列校勤不見紀盡忠爲國翻成重愆斯蒙恬所以悲號於邊獄白起歎歎于杜郵也

原注·史記·胡亥遣使者殺蒙恬·恬不肯死·使者卽洮屬之遼城萬餘里·此其中不能無絕地脈·此乃恬之罪也·達吞藥自殺·秦王免白起以屬吏繫于陽周·恬喟然太息曰·恬罪當死矣·起

爲士伍·遷之陝寧·白起旣行·出咸陽西門十里·至杜郵·秦王乃使使者賜之劍·自裁·太傅曰·槐之言惄也·惄來人于此欲與謀也·樹棘以爲位者

東征而耗亂王命寵任非所凡所舉用皆衆所捐棄而容納其策以爲謀主令臣骨肉兄弟還爲讎敵交鋒接刃構難滋甚臣雖欲釋甲投戈事不得已誠恐陛下日月之明有所不照四聰之聽有所不聞乞下臣章咨之羣賢使三槐九棘議臣罪戾

原注·周官·三槐·三公位焉·左九棘·孤卿大夫位焉·右九棘·公侯伯子男位焉·鄭元注曰·槐之言惄也·惄來人于此欲與謀也·樹棘以爲位者

象以赤心而外刺。若以臣今行權爲釁。則桓文當有誅絕之刑。原注齊桓晉文皆以諸侯行天子事故云行權。若以衆不討賊爲賢。則趙盾可無書弑之貶矣。原注左氏傳趙穿攻靈公子缺閭宣子未出山而復太史書曰趙盾弑其君以示于朝宣子曰不然對曰子爲正卿亡不越境反不討賊非子而誰臣雖其子旦從上下暮從下上平均如一言善入君子執義亦如此。絕邪詔之論。無令臣結恨三泉。於是以紹爲太尉。封鄴侯。時曹操自爲大將軍。紹恥爲之下。原注漢制太尉位在大將軍上明帝以東平王蒼爲驃騎大將軍以王故位公上和帝以舅寶征匈奴還遷大將軍在公上自是大將軍位在太尉上。表辭不受。操懼讓位於紹。二年春袁術稱帝于壽春。三月詔將作大匠孔融持節拜紹大將軍。錫弓矢節鉞虎賁百人。兼督冀、青、幽、并四州。然後受之。紹每得詔書。患有不便于己。乃欲移天子自近。使說操以許下埤。音婢原注溼雒陽殘破。宜徙都鄆城。以就全實。操拒之。田豐說紹曰。徙都之計既不克從。宜早圖許。奉迎天子。動託詔書。號令海內。此算之上者。不爾。終爲人禽。悔無益也。紹不從。會紹亡卒詣操。云田豐勸紹襲許。操方圍張繡于穰。引兵還。密謀圖紹。四年春紹復擊公孫瓚。瓚易京破之。斬瓚遂并其衆。拓定幽土。盡有河朔四州之地。志驕氣盈。貢御希簡。主簿耿包密白紹曰。赤德衰盡。袁爲黃允。宜順天人。稱尊號。原注獻帝春秋袁舜後黃應代赤故包有此言舞以土德王故黃漢火德故赤。紹以包白事示軍府僚屬。皆言包妖妄。宜誅。紹不得已。殺包以自解。又以初年號與本初字合。必能克平禍亂。於是簡精兵十萬騎萬匹。以審配、逢紀統軍事。田豐、荀彧、許攸爲謀主。顏良、文醜爲將帥。欲以攻許。原注世語紹步卒五萬騎千孫盛評曰案魏武謂崔豹曰昨案貴州戶籍可得三十萬衆由此推之

但冀州勝兵已如此。況兼幽并及青州乎。
紹之大舉必悉師而起。十萬近之矣。

沮授諫曰。譖案。志注作沮。近討公孫師出歷年。百姓疲弊。倉庫無積。賦

役方殷。未可動也。宜務農息民。先遣使獻捷天子。若不得通。乃表曹操隔我王路。然後進屯黎陽。漸營河南。益作舟船。繕修器械。分遣精騎。鈔其邊鄙。令彼不得安。我取其逸。如此可坐定也。

郭圖、審配曰。兵法十圍五攻。敵則能戰。今以明公之神武。連河朔之強衆。以伐曹操。其勢易若覆手。何必乃爾。授曰。救亂誅暴。謂之義兵。恃衆馮強。謂之驕兵。義者無敵。驕者先滅。曹操奉迎天子。建宮許都。以令天下。今舉師南向于義。則違且廟勝之策。不在強弱。曹操法令旣行。士卒精練。非公孫瓚坐受圍者也。今棄萬安之術。而興無名之師。竊爲公懼之。圖配曰。武王伐紂。不爲不義。況兵加曹操而云無名。且今師徒精勇。將士思奮。而不及時。早定大業。所謂天與不取。反受其咎。此越之所以霸吳。之所以滅也。監軍之計。在于持牢。而非見時知幾也。紹納圖言。圖等因是譖授曰。授監統內外。威震三軍。若其浸盛。何以制之。夫臣與主同者亡。此黃石之所忌也。且御衆于外。不宜知內。紹乃分授所統爲三都督。使授及郭圖、淳于瓊各典一軍。騎都尉崔烈諫曰。天子在許。民望助順。不可攻也。紹不從。

袁紹下

五年。昭烈殺徐州刺史車胄。據沛以圖曹操。操懼。乃自將擊昭烈。田豐說紹曰。與公爭天下者。曹操也。操今東擊劉備。兵連不可卒解。舉兵而襲其後。可一往而定。兵以幾動。斯其時也。紹辭以子疾。未得行。豐舉

杖擊地曰嗟乎事去矣夫遭難遇之幾而以嬰兒病失其會惜哉紹聞而怒之遂疏焉曹操畏紹渡河急擊昭烈破之昭烈奔紹紹于是進軍攻許田豐以旣失前幾不宜便行諫紹曰曹操旣破劉備則許下非復空虛且操善用兵變化無方衆雖少未可輕也今不如久持之將軍據山河之固擁四州之衆外結英雄內修農戰然後簡其精銳分爲奇兵乘虛迭出以擾河南救右則擊其左救左則擊其右使敵疲于奔命人不得安業我未勞而彼已困不及三年可坐克也今釋廟勝之策而決成敗于一戰若不如志悔無及也紹不從豐強諫忤紹以爲沮衆遂械繫之紹乃宣檄州郡曰蓋聞明主圖危以制變忠臣慮難以立權是以有非常之人然後有非常之事有非常之事然後立非常之功夫非常者故非常人所擬也曩者強秦弱主趙高執柄專制朝權威福由己時人迫脅莫敢正言終有望夷之禍祖宗焚滅汗辱至今永爲世鑒原注史記秦二世夢白虎齧其左驥馬殺之怪問占夢卜曰涇水爲祟二世乃齋望夷宮欲祀涇水使使責讓趙高以盜事高懼乃陰與甘培咸陽今閭樂數二世二世自殺及臻呂后季年產祿專政內兼二軍外統梁趙擅斷萬機決事省禁下陵上替海內寒心于是絳侯朱盧興兵奮怒誅夷逆暴尊立太宗故能王道興隆光明顯融此則大臣立權之明表也司空曹操祖父中常侍騰與左悊徐璜並作妖孽饕餮放橫傷化虐民父嵩乞匱攜養因贓假位輿金輦璧輸貨權門竊盜鼎司傾覆重器原注騰嵩事並見曹操傳後漢書左悊名璜下邳人爲常侍河操贊闔遺醜本無懿德標狡鋒俠好亂樂禍幕府昔統鷹揚原注書音義衛青征匈奴大克獲帝就拜大將軍于幕中因曰幕府掃除凶逆續遇董卓侵官暴國于是提劍揮鼓發命東夏收羅英雄棄瑕

取用故遂與操同諮詢謀授以裨師謂其鷹犬之才爪牙可任至乃愚佻短略輕進易退傷夷折衄數喪師徒幕府輒復分兵命銳修完補輯表行東郡領兗州刺史被以虎文將跋威柄質虎皮言操本羊質而被以虎文也李賢引續漢志云虎貢將冠鵠冠虎文單衣文選注獎勸也又曰跋成也言獎成其威柄也不出遂霸西戎而操遂承資跋扈肆行凶忒原注謝承後漢書操得兗州衆強威內懷反紹意割剝元元殘賢害善故九江太守邊讓英才俊偉天下知名直言正色論不阿諂身首被梟懸之誅妻孥受灰滅之咎原注事見讓本傳自是士林憤痛民怨彌重一夫奮臂舉州同聲故躬破于徐方地奪于呂布彷徨東裔蹈據無所幕府惟強幹弱枝之義且不登叛人之黨原注左氏傳闔宋彭城非宋地也于是爲宋討魚石故稱宋且不登叛人呂布也故復援旌擐甲席卷赴征金鼓響振布衆奔沮拯其死亡之患復其方伯之位原注謝承後漢書操聞呂布于濮陽爲布所破投紹紹哀之乃給兵五千人還取兗州則幕府無德于兗士之民而有大造于操也後會鑾駕反旆羣虜寇攻時冀州方有北鄙之警匪遑離局原注禮記各司其局左氏傳離局姦也局誤宮敗法亂紀坐召三臺專制朝政爲憲臺謁者爲外臺召文選作鎮則幕府無德于兗士部分也故使從事中郎徐勳就發遣操使繕修郊廟翊衛幼主操便放志專行脅遷省禁卑侮王室譖案陳志注作王所惡滅三族原注五宗高祖及孫三族父族母族妻族也羣談者受顯誅腹議者蒙隱戮百寮鉗口道路以目尙書記朝會公卿充員品而已故太尉楊彪歷典三司享國極位操因緣睚眦被以非罪榜楚參并五毒備至觸情任忒不顧憲章原注事見彪本傳文選作綱又議郎趙彥忠諫直言議有可納是以聖朝含聽改容加錫原注文操欲迷

奪時明杜絕言路擅收立殺不俟報聞又梁孝王先帝母弟墳陵尊顯桑梓松柏猶宜恭肅而操帥將吏士親臨發掘破棺裸屍掠取金寶至令聖朝流涕士民傷懷操又特置發丘中郎將摸金校尉謹案宋書魏武帝有發丘中郎摸金校尉所過墮突無骸不露身處三公之位而行桀虜之態汙國虐民毒施人鬼加其細政苛慘

謹案宋書魏帝紀曰

科防互設督繳充蹊坑筭塞路舉手挂網羅動足觸機陷是以竟豫有無聊之民帝都有吁嗟之怨歷觀載籍無道之臣貪殘酷烈于操爲甚幕府方詰外姦未及整訓加意含覆冀可彌縫而操豺狠野心潛包禍謀乃欲摧撓棟梁孤弱漢室除滅忠正專爲梟雄往者伐鼓北征公孫瓚強禦桀逆拒圍一年操因其未破陰交書命外助王師內相掩襲故引兵造河方舟北濟會其行人發露瓚亦梟夷故使鋒芒挫縮厥圖不果爾乃大軍過蕩西山屠各左校皆束手奉質爭爲前登犬羊殘醜消淪山谷于是操師震懼晨夜逋遯屯據敖倉阻河爲固原注獻帝春秋操引軍造河託言助紹實圖冀縣以爲瓚援會瓚破滅紹亦覺之以軍退屯守敖倉欲以螗螂之斧禦隆車之隧

原注莊子蘧伯玉謂顏闐曰汝不知夫螗螂乎怒其臂以當車轍幕府奉漢威靈折衝宇宙長戟百萬胡騎千羣奮中黃育獲之士子中黃伯曰余左執大行之擾而右搏彫虎戰國策范增謂秦王曰烏獲之焉而死夏育之勇焉而死聘良弓勁弩之勢并州越太行

高幹青州涉濟濕袁譯

大軍汎黃河而角其前荊州下宛葉而掎其後原注劉表雷震虎步並集虜庭若舉炎火以燄飛蓬覆滄海以沃熛炭有何不消滅者哉又操軍吏士其可戰者皆自出幽冀或故營部曲咸怨曠思歸流涕北顧其餘竟豫之民及呂布張楊之遺衆覆亡迫脅權時苟從各被創夷人爲讎敵若迴旆方徂登高岡而擊鼓

吹揚素塵以啓降路必土崩瓦解不俟血刃方今漢室陵遲綱維弛絕聖朝無一介之輔股肱無折衝之勢方畿之內簡練之臣皆垂頭塌翼莫所凭恃雖有忠義之佐脅于暴虐之臣焉能展其節又操持部曲精兵七百圍守宮闕外託宿衛內實拘執懼其篡逆之萌因斯而作此乃忠臣肝腦塗地之秋烈士立功之會也可不畧哉操又矯命稱制遣使發兵恐邊遠州郡過聽而給與強寇弱主違衆旅叛舉以喪名爲天下笑則明哲不取也卽日幽并青冀四州並進書到荊州便勒見兵與建忠將軍協同聲勢州郡各整戎馬羅落境界舉師揚威並匡社稷則非常之功于是乎著其得操首者封五千戶侯賞錢五千萬部曲偏裨將校諸吏降者勿有所問廣宣恩信班揚符賞布告天下咸使知聖朝有拘逼之難謹案此檄文皆據三國志荀錄者不同紹進軍黎陽臨發沮授會其宗族散貲財以與之曰夫勢存則威無不加勢亡則不保一身哀哉其弟宗曰曹操士馬不敵君何懼焉授曰以曹兗州之明略挾天子以爲資我雖克伯珪衆實疲弊而將驕主怠軍之破敗在此行也揚雄有言六國蚩蚩爲羸弱姬其今之謂乎紹先遣顏良攻操將劉延于白馬授又諫紹曰良性促狹雖驍勇不可獨任紹不聽操救延與良戰斬良紹渡河壁延津南沮授臨船歎曰上盈其志下務其功悠悠黃河吾其濟乎遂以疾退紹不許而意恨之復省其所部并屬郭圖紹使昭烈及文醜挑戰操又擊破之斬醜再戰而禽二將軍中大震操還軍官渡紹進保陽武沮授又說紹曰北軍雖衆而勁果不及南軍南軍穀少而資儲不如北軍南幸于急戰北利于緩師宜徐持久曠以日月

紹不從連營稍前逼官渡。遂合戰。操軍不利復還堅壁。紹爲高櫓起土山。射營中矢下如雨。營中蒙楯而行。操乃爲發石車擊紹樓皆破。紹軍呼爲霹靂車。紹爲地道欲襲操。操輒于內爲長轎以拒之。又遣奇兵襲紹運車。大破之。盡焚其穀食。相持百餘日。操軍糧盡疲困。多叛應紹。紹遣淳于瓊等將兵萬餘人北迎糧運。沮授說紹可遣蔣奇別爲支軍于表以絕操之鈔。紹不從。許攸曰：「曹操兵少而悉師拒我。許下餘守勢必空弱。若分遣軍星夜掩襲許拔則奉天子以討操。操成禽矣。如其未潰可令首尾奔命。破之必也。」紹又不能用。會攸家犯法審配收繫之。攸遂奔操。而說使襲取淳于瓊等時在烏巢去紹軍四十里。操自將步騎五千人夜往攻之。紹聞操擊瓊。謂長子譚曰：「就操破瓊吾拔其營。彼固無所歸矣。」乃使高覽、張郃等攻操營。郃曰：「曹操精兵往必破瓊等。瓊等破則事去矣。請先往救之。」郭圖固請攻操營。郃曰：「曹操營固。攻之必不拔。瓊等見禽吾屬盡爲虜矣。」紹但遣輕騎救瓊。而以重兵攻操營。不能下。操大破瓊等。斬之盡燔其穀。紹軍怖懼。郭圖慙其計。反譖張郃于紹曰：「郃快軍敗。郃忿懼。遂與高覽焚攻具。詣操降。」于是紹軍大潰。紹與譚等幅巾乘馬。與八百騎渡河。至黎陽北岸。入其將軍蔣義渠營。至帳下。把其手曰：「孤以首領相付矣。義渠避帳而處之。使宣令焉。衆聞紹在。稍復集。餘衆降操。操盡阬之前後八萬人。沮授爲操軍所執。乃大呼曰：『授不降也。』爲所執爾。操見授。謂曰：『分野殊異。遂用圮絕。不圖今日乃相得也。』授對曰：『冀州失策。自取奔北。授智力俱困。宜其見禽。』操曰：『本初無謀。不用君計。今喪亂過紀。國家未定。方當與君圖之。』」

授曰叔父母弟縣命袁氏若蒙公靈速死爲福操歎曰孤早相得天下不足慮也遂赦而厚遇焉授尋謀歸紹乃誅之軍還或謂田豐曰君必見重矣豐曰公貌寬而內忌不亮吾忠而吾數以至害迂之若勝而喜必能赦我戰敗而恚內忌將發吾必死矣紹軍士旣敗皆拊膺泣曰向令田豐在此必不至于敗也紹謂逢紀曰冀州諸人聞吾軍敗皆當念吾推田別駕前諫止吾與衆不同吾亦慙見之紀曰豐聞將軍之退拊手大笑喜其言之中也紹于是謂僚屬曰吾不用田豐言果爲所笑遂殺之初操聞豐不從戎喜曰紹必敗矣及紹奔遁復曰向使紹用其別駕計尙未可知也原注孫盛曰觀田豐沮授之謀雖良平何以過之臣奉闈后則覆亡之禍至存亡榮辱常必由茲豐知紹將敗敗則已必死甘冒虎口以盡忠規烈士之子所事慮不存己夫諸侯之臣義有去就況豐與紹非純臣乎詩云逝將去女適彼樂土晉去亂邦就有道可也審配二子爲操所禽紹將孟岱言于紹曰配在位專政族大兵強且二子在南必懷反計郭圖辛評亦以爲然紹遂以岱爲監軍代配守鄴護軍逢紀素與配不睦紹以問之紀曰配天性烈直每慕古人之節必不以二子在南爲不義也願公勿疑紹曰君不惡之邪紀曰先所爭者私情也今所陳者國事也紹曰善乃不廢配配由是更與親厚冀州城邑叛紹者紹稍復擊定之紹爲人寬雅有局度喜怒不形于色而性矜慎自高短于從善故至于敗六年曹操以紹新敗欲乘其困遂定之夏四月揚兵河上擊紹倉亭軍破之紹軍不出操乃還七年春操復進軍官渡紹自軍敗憤發病嘔血夏五月卒紹政寬百姓德之河北士女莫不悼念市巷揮涕如喪所親紹後妻劉性酷妒紹死未殯盡殺紹寵妾五人曰死者有知當復被寵地下

乃髡頭墨面殘毀其形又盡滅其家紹三子譚字顯思熙字顯雍尙字顯甫譚長而惠尙少而美劉氏有寵而愛尙數稱于紹紹亦奇其姿容欲以爲嗣而未顯言之乃以譚繼兄後出爲青州刺史沮授諫曰世稱萬人逐免一人獲之貪者悉止分定故也原注 慎子免走于街百人逐之貪人俱存人莫之非昔以免爲未分定故也積免滿市過不能顧非不欲免也分定之後雖鄙不爭且年鈞以賢德鈞則卜吉之制也願上惟先代成敗之誠下思逐免分定之義紹曰吾欲令四兒各據一州以觀其能授出曰禍其始此乎于是以中子熙爲幽州刺史外甥高幹爲并州刺史譚至青州其土自河而西不過平原譚北排田楷東破孔融曜兵海隅威惠甚著流民多歸之寢以富強其後信用羣小驕奢淫佚華彥孔順姦佞猾險委以腹心別駕王修忠良正直備員而已使婦弟領兵內草竊市井外剽掠田野又使兩將募兵屬縣有賂者免白籍貧民竄伏丘墓放兵捕索如獵鳥獸于是聲望大損境土蕭條復如始至之日矣及紹卒嗣猶未定逢紀審配以驕縱爲譚所惡辛評郭圖皆比于譚而與紀配有隙衆以譚長欲立之配等恐譚立而評等爲害遂與劉氏謀矯紹遺命奉尙爲嗣譚至不得立自稱車騎將軍出屯黎陽尙少與之兵而使逢紀隨之譚求益兵審配等又議不與譚怒殺逢紀八年春曹操渡河攻譚譚告急于尙尙乃留審配等守鄴自將助譚與操相拒于黎陽自九月至明年二月謹案後漢書與此合月陳志作自二月至九大戰城下譚尙敗夜遁還鄴操追至鄴收其麥尙逆擊破操操軍還許譚謂尙曰我鎧甲不精故前爲曹操所敗今操軍退人懷歸志及其未濟出兵掩之可令大潰此幾不可失也尙疑而不許既不益兵又

不易甲。譚大怒。郭圖辛評因謂譚曰：使先公出將軍爲兄，後者皆審配之謀也。譚遂引兵攻尙，戰于門外。譚敗，乃引兵還南皮。王修率吏人自青州往救譚。譚還，欲更攻尙。修曰：兄弟者，左右手也。譬人將鬪而斷其右手，我必勝其可乎？夫棄兄弟而不親，天下其誰親之？屬有讒人交鬪其間，以求一朝之利，願塞耳勿聽也。若斬佞臣數人，復相親睦，以御四方，可橫行天下。譚不從。譚將劉詢起兵濕陰，以叛譚，諸城皆應。譚歎曰：今舉州皆叛，豈孤之不德邪？修曰：東萊太守管統雖在海表，此人不反。後十餘日，統果棄其妻子赴譚，妻子爲賊所殺。譚更以統爲樂安太守。尙復自攻譚，譚戰大敗，嬰城固守。尙圍之急，譚奔平原。尙軍館陶，譚復出擊，尙敗走險。譚追擊之，尙設伏出奇，復大破譚，僵尸十餘里。譚復走保平原。尙復攻之，戰于門外。譚軍復敗。郭圖說譚曰：今將軍國小兵少，糧匱勢弱。顯甫之來，外則不敵，愚以爲可呼曹操使擊顯甫，操至必先攻鄰。顯甫還救，將軍引兵而西，自鄴以北盡可獲也。若顯甫破敗，其兵散亡，又可斂取以拒操。操遠來糧餉不繼，必自逃去。則趙國以北皆我之有，亦足與操爲對矣。譚始不納，後遂從之。問誰可使，圖曰：辛佐治可。譚遂遣毗詣操請救。時操南擊劉表，次於西平。毗見操致譚意，且陳取尙平河朔策以自結于操。操大悅，乃許譚平。劉表遺譚書曰：天降災害，禍難殷流，初交殊族，卒成同盟，使王室震蕩，彝倫攸斁。是以智達之士莫不痛心入骨，傷時人不能相忍也。然孤與太公志同願等，雖楚魏絕邈，山河迥遠，戮力乃心，共獎王室，使非族不干吾盟，異類不絕吾好。此孤與太公無貳之所致也。功績未卒，太公殂殞。

賢允承統以繼洪業宣奕世之德履丕顯之祚摧嚴敵于鄴都揚休烈于朔土顧定疆宇虎視河外凡我同盟莫不景附何寤青蠅飛于竿旌無忌游于二壘原注無忌楚譏人費無忌使股肱分成二體智聰絕爲異身初聞此問尙謂不然定聞信來乃知閼伯實沈之忿已成原注左氏傳高辛氏有二子伯曰閼伯季曰實沈居于曠林不相能也日尋干戈以相征討棄親卽仇之計已決旃旆交于中原暴尸累于城下聞之哽咽若存若亡昔三王五伯下及戰國君臣相弑父子相殺兄弟相殘親戚相滅蓋時有之然或欲以成王業或欲以定霸功皆所謂逆取順守而徼富強于一世也未有棄親卽異兀其根本而能全于長世者昔齊襄公報九世之讎士匄卒苟偃之事是故春秋美其義君子稱其信夫伯游之恨于齊未若太公之忿于曹也宣子之承業未若仁君之繼統也原注公侯大去其國大去者何滅也孰滅之齊滅之曷爲不言齊滅之爲襄公諱也春秋爲賢者諱何賢乎襄公復讎也何讎爾還祖也袁公亨乎周紀侯謂之還祖者幾世乎九世矣九世猶可以復讎乎雖百世可也左氏傳苟偃將中軍士匄佐之伐齊濟河病目出及卒而視不可舍士匄撫之曰主苟終所不嗣事于齊者有如河乃瞑受舍苟偃字伯游宣子即士匄也且君子遠難不適讎國交絕不出惡聲况忘先人之讎棄親戚之好而爲萬世之戒遺同盟之恥哉蠻夷戎狄將有誚讓况我族類而不痛心邪夫欲立竹帛于當時全宗祀于一世豈宜同生分謗爭校得失乎若冀州有不弟之傲無慈順之節仁君當降志辱身以濟事爲務事定之後使天下平其曲直不亦爲高義邪今仁君見憎于夫人未若鄭莊之于姜氏昆弟之嫌未若重華之于象敖然莊公卒崇大隧之樂象敖終受有鼻之封捐弃百痼追攝舊義復爲母子昆弟如初原注左氏傳鄭武姜生莊公及共叔段愛段請京使居之段將襲鄭夫人將啓之莊公伐段段出奔共遂寘姜氏于城穎而晝之曰不及黃泉無相見也既而悔之穎考叔

曰若掘地及泉隧而相見其誰曰不然從之公入而賦大隧之中其樂也融融姜出而賦大隧之外其樂也洩洩遂爲母子如初史記舜母死瞽瞍更娶妻生象象常欲殺舜舜踐帝位封象有庳爲諸侯今整勒士馬瞻望鵠立又與尙書曰知變起辛卯禍結同生追闕伯實沈之蹤忘常棣死喪之義親尋干戈僵尸夷踐奄遷皆所以翦除穢害而定王業非強弱之爭喜怒之忿也故雖滅親不尤誅兄不傷今二君初承宏業纂繼前轍進有國家傾危之慮退有先公遺恨之負當惟義是務惟國是康何者金木水火剛柔相濟然後克得其和能爲人用今青州天性峭急迷于曲直仁君度數宏廣綽然有餘當以大包小以優容劣先除曹操以平先公之恨事定之後乃議曲直之評不亦善乎若留神遠圖克己復禮當振旅長驅共獎王室若迷而不反遵而不改則胡夷將有誚讓之言況我同盟復能戮力仁君之役哉此韓盧東郭自困于前而遺田父之獲者也原注戰國策齊欲伐魏淳于髡謂齊王曰韓子盧者天下之疾犬也東郭遼者海內之狡兔也韓子盧逐東郭遼環山者三騰山者五兔極于前犬兔俱罷各死其處田父見之無勞勸之苦而擅其功今齊魏久相持以頓其兵敝其衆臣恐強秦大楚承其後有田父之功齊王懼謝將休士憤躍鶴望冀聞和同之聲若其泰也則袁族其與漢升降乎如其否也則同盟永無望矣譚尙並不從曹操遂還救譚十月至黎陽尙聞操渡河乃釋平原還鄴尙將呂曠高翔叛歸曹操譚復陰刻將軍印以假曠翔操知譚詐乃爲子整聘譚女以安之而引軍還九年三月尙使審配蘇由守鄴復攻譚于平原配獻書于譚曰配聞良藥苦口利于病忠言逆耳便于行願將軍緩心抑怒終省愚辭蓋春秋之義國君死社稷忠臣死君命苟圖危宗廟剝亂國家

親疏一也。是以周公垂涕以蔽管蔡之獄。季友歎欷而行叔牙之誅。

原注·左氏傳·公疾·問後于叔牙·對曰·臣以死奉般·公曰·向者牙曰慶父材·成季使以君命·命僖叔待于鍼·巫氏使鍼·季配之曰·飲此則有後于魯國·不然死且無後·飲之·歸及達泉而卒·

何則義重人輕事不獲已故也。昔衛靈公廢

蒯聩而立輒。蒯聩爲不道入戚以篡衛師伐之春秋傳曰以石曼姑之義爲可以拒之是以蒯聩終獲叛逆之罪而曼姑永享忠臣之名。

原注·公羊傳·晉趙鞅帥師納衛世子蒯聵于戚·戚者何·衛之邑也·曷爲不言入于衛·父有子·子不得有父也·齊國夏衛石曼姑帥師圍戚·齊國夏曷爲與衛石曼姑圍

戚·伯討也·此其爲伯討柰何·曼姑受命乎靈公而立輒·以曼姑之義爲固可以拒之也·輒

者何·蒯聵之子也·然則曷爲不立蒯聵而立輒·輒之義可以立也·父子猶然況兄弟乎·昔先

公廢絀將軍以續賢兄·立我將軍以爲適嗣·上告祖靈·下書譜牒·先公謂將軍爲兄子·將軍謂先公爲叔父·海內遠近誰不備聞·且先公卽世之日·我將軍斬衰之廬·而將軍齋于堊室·出入之分子斯益明·時凶

臣逢紀妄畫蛇足·原注·戰國策·楚有祠者·賜其舍人卮酒·舍人相謂曰·數人飲之不足·一人飲之有餘·請各畫地爲蛇·先成者飲酒·一人蛇先成·引酒且飲·乃左手持卮·右手畫蛇曰·吾能爲之足·未成·

一人之蛇成·奪其卮曰·蛇固無足·子安能爲之足·遂飲其酒·爲蛇足者·終亡其酒·曲辭諂媚交亂懿親·我將軍奮赫然之怒·誅不旋踵·將軍亦奉命

承旨加以淫刑·自是之後·癰疽破潰·骨肉無絲髮之嫌·自疑之臣皆保生全之福·故悉遣強胡·簡命名將

料整器械·選擇戰士·殲府庫之財·竭食土之實·其所以供奉將軍·何求而不備·君臣相率共衛旌麾·戰爲

雁行賦爲幣主·雖傾倉覆庫·翦剝民物·上下欣戴·莫敢告勞·何則·推戀戀忠赤之情·盡家家肝腦之計·脣齒輔車·不相爲傷·原注·左氏傳·宮之奇曰·輔車相依·脣亡齒寒·其虞虢之謂乎·謂爲將軍心合意同·混齊一體·必當并威偶勢·禦寇寧

家·何圖凶險讒慝之人·造飾無端·誘導姦利·至令將軍翻然改圖·忘孝友之仁·聽豺狼之謀·襲闕沈之迹·

誣先公廢立之言遠近者在喪之位悖紀綱之理不顧逆順之節橫易冀州之主欲當先公之繼遂放兵
鈔突屠城殺吏交屍盈原裸民滿野至于髡鬚髮膚割截支體冤魂痛于幽冥創痍被于草棘又乃圖獲
鄴城許賜秦胡財物婦女豫有分數又告令吏士云孤雖有老母輒使身體完具而已聞此言者莫不驚
愕失氣悼心揮涕使太夫人憂哀憤懣我州君臣士友假寐悲歎念欲靜師拱默以聽執事之圖則懼違
春秋死命之節詒太夫人不測之患隕先公萬世之業且三軍憤慨人懷私怒我將軍辭不獲命以及館
陶之役是時外爲禦侮內實乞罪旣不見赦而加屠辱各二三其心臨陳叛戾我將軍進退無功首尾受
敵引兵奔避不敢告辭亦謂將軍少垂親親之仁覩以緩追之惠原注·穀梁傳·緩追
逸賊·親親之道也而乃尋蹤躡軌無所
逃命困獸必鬪以干嚴刑而將軍師旅土崩瓦解此非人力乃天意也是後又望將軍克己復禮追還孔
懷如初之愛而縱情重怒散鋒放火播增毒蠻烽烟相望涉血千里遺城厄民引領悲怨雖欲勿救惡得
已哉故遂引軍東轍保正疆場雖近郊壘未侵境域然望旌麾能不永歎配等備先公家臣奉廢立之命
而圖等干國亂家禮有常刑故奮敝州之賦以除將軍之疾伏惟將軍至孝烝烝發于岐嶷友于之性生
于自然卒之以聰明行之以敏達覽古今之舉措觀興敗之徵符輕榮財于糞土貴名高于丘嶽何意奄
然迷沈墮賢哲之操積怨肆忿取破家之禍翹企延頸待望仇敵委慈親于虎狼之牙以逞一朝之志豈
不痛哉若乃天啓尊心革圖易慮則我將軍匍匐悲號於將軍股掌之上配等亦當敷躬布體以聽斧鑕

之刑。若必不悛。有以國斃。圖頭不縣。軍不反旆。願將軍詳度事宜。錫以環玦。原注·荀子·絕人以玦·反人以環。譚得書。登城而泣。既劫于郭圖。又以兵鋒累交。遂不納。曹操進攻鄴。到洹水。去鄴五十里。蘇由爲內應。謀泄。與配戰城中。敗出奔操。操遂爲土山地道攻之。配亦于內作塹以當之。配將馮札謹案·馮札與後漢書合·陳志作馮禮。爲內應。開突門。內操兵三百餘人。原注·墨子備突篇·城百步一突門·突門用車兩輪·以木束之·塗其上維·置突門內·度門廣狹之令人入門四尺·中置壅塞·門旁爲橐充籠杖·又置艾寇·卽入下輪而塞之·鼓橐薰之也。配覺之。從城上以大石擊門。門閉。入者皆死。操乃鑿塹圍城。周四十里。初令淺示若可越。配望而笑之。不出。爭利。操一夜濬之。廣深二丈。引漳水以灌之。自五月至八月。城中餓死者過半。尚聞鄴急。將軍萬餘人未到。欲令審配知外動止。先使主簿鉅鹿李孚入城。孚研問事杖繫馬邊。自著平上幘。將三騎投暮詣鄴下。自稱都督。歷北圍。循表而東。步步呵責。守圍將士隨輕重行其罰。遂歷操營前。至南圍。當章門。復責怒守圍者。收縛之。因開其圍。馳到城下。呼城上人。城上人以繩引孚。得入。配等見孚。悲喜鼓譟。稱萬歲。守圍者以狀聞。操笑曰。此非徒得入也。方且復出。孚知外圍益急。不可復冒。乃請配悉出城中老弱以省穀。夜簡別數千人。皆使持白幡。從三門並出降。孚復將三騎作降人服。隨輩夜出。突圍得去。尚乃依西山來。東至陽平亭。去鄴十七里。臨滏水。舉火以示城中。城中亦舉火應之。配出兵城北。欲與尚對決。圍。操逆擊之。敗還。尚亦破走。依曲漳爲營。操復圍之。未合。尚懼。遣陰夔、陳琳求降。不聽。尚還走藍口。謹案·藍口與後漢書合·陳志作澠口。操復進急圍之。尚將馬延等臨陳降。衆大潰。尚奔山中。盡收其輜重。得尚印綬節鉞及衣物。以示城中。城中

崩沮。審配令士卒曰：「堅守死戰，操軍疲矣。幽州方至，何憂無主？」操出行圍，配伏弩射之，幾中。配兄子榮爲東門校尉，榮夜開門內操兵，初譚之去。辛毗郭圖家得出，而辛評家獨被收。及操兵入，配在城東南角樓見之，知城必陷。忿辛郭破壞冀州，遣人馳詣鄰獄，指殺評家。配乃拒戰城中，操兵生縛配，詣帳下。毗聞配屠評家，逆以馬鞭擊配頭罵之曰：「奴汝今日眞死矣！」配顧曰：「狗輩正由汝曹破我冀州，恨不得殺汝，且汝今日能生殺我邪？」有頃，操見引謂配曰：「知誰開卿城門？」配曰：「不知也。」操曰：「自卿子榮爾。」

謹案·志注作自禪文榮爾·文字訛。

配曰：「小兒不足用，乃至此。」操復謂曰：「曩者孤行圍，何弩之多也？」配曰：「恨其少爾。」操曰：「卿忠于袁氏父子，亦不得不爾也。有意欲活之，配意壯烈，終無撓辭。而辛毗等號哭不已，乃殺之。」

原注·樂資山陽公載紀及袁暉獻帝春秋·並云太祖兵入城·審配

戰于門中·既敗·逃于井中·於井獲之·裴松之曰·配一代烈士·袁氏之死臣·豈當數窮之日·方逃身于井·此之難信·誠

爲易了·不知賚暉之徒·竟爲何人·未能識別然否·而輕弄翰墨·妄生異端·以行其書·如此之類·正足以誣罔觀聽·疑

誤後生矣·實史籍之罪人·達學之所不取者也·

初，冀州張子謙先降，素與配不合，笑謂配曰：「正南卿竟何如我？」配厲聲曰：「汝爲降

虜，審配爲忠臣。雖死，豈羨汝生邪？」臨刑，叱持兵者令北向曰：「我君在北也。」見者莫不歎息。操以尚在，乃全尚母妻子，還其財寶。操子不見熙妻甄氏美，卽納之。高幹以并州降，復爲刺史。操之圍鄴也，譚復背之，因略取甘陵、安平、渤海河間，攻尚于中山。尚敗走故安，從熙而譚悉收其衆，還屯龍湊。十二月，操討譚軍其門，譚夜遁奔南皮，臨清河而屯。明年正月，急攻之。譚欲出戰，軍未合而敗。譚被髮驅馳，追者意非恆人，趨奔之。譚墮馬，顧曰：「咄！兒過我。我不能富貴汝。」言未絕口，頭已斷地。李孚自稱冀主簿，求見操曰：「今城中強弱

相陵。人心擾亂。以爲宜令新降爲內所識信者。宣傳明教。操即使孚往入城。告諭吏民。使各安故業。不得侵凌。城中乃安。操于是斬郭圖等及其妻子。袁譚使王修運糧于樂安。聞譚急。卽將所領兵往赴之。至高審。聞譚死。下馬號哭曰。無君焉歸。遂詣曹操。乞收葬譚屍。操欲觀修意。默然不應。修復曰。受袁氏厚恩。若得斂譚屍。然後就戮。無所恨。操乃許之。原注·傅子曰·太祖旣誅袁譚·梟其首·令曰·敢哭者戮及妻子·于是王叔治田子秦相謂曰·生受辟命·亡而不哭·非義也·畏死忘義·何以立世。遼造其首而哭之。哀動三軍。軍正自行其戮。太祖曰。義士也。赦之。裴松之曰。案田疇傳。疇爲袁尚所辟。不被譚命。傅子合而言之。有違事實。以修爲督軍糧。還樂安。譚所部諸城皆服。惟樂安太守管統不下。操命修取統首。修以統亡國忠臣。解其縛。使詣操。操悅而赦之。袁氏政寬。在職勢者多畜聚。操破鄴籍。沒審配等家財物。以萬數。及破南皮。閱修家穀。不滿十斛。有書數百卷。操歎曰。士不妄有名。辟修司空掾。尚熙爲其將。焦觸張南所攻。奔遼西。烏桓觸自號幽州刺史。驅率諸郡太守。令長。背袁向曹。陳兵數萬。殺白馬盟。令曰。違者斬。衆莫敢仰視。各以次敵。至別駕代郡韓珩曰。受袁公父子厚恩。今其破亡。智不能救。勇不能死。于義闕矣。若乃北面曹氏。所不能爲也。一坐爲珩失色。原注·先賢行狀·珩字子侃。代郡人。清粹有雅量。少喪父母。奉養兄姊。宗族稱弟。觸曰。夫舉大事。當立大義。事之濟否。不待一人。可卒珩志。以厲事君。操聞珩節甚高。之屢辟不至。卒于家。高幹聞操討烏桓。復以并州叛。執上黨太守。舉兵守壺口關。操遣樂進、李典擊之。幹還守壺關城。十一年春正月。操自將擊幹。幹聞之。留別將守城。走匈奴求救于單于。單于不受。操圍壺關三月。拔之。幹遂走荊州。上雒都尉王刻捕斬之。原注·典略·上雒都尉王刻獲高幹。以功封侯。其妻哭于室。以爲刻富貴將更娶妾媵而奪已愛故也。十二

年曹操征遼西擊烏桓。尙熙與烏桓逆操軍戰敗走。乃與親兵數千人奔公孫康于遼東。尙有勇力。先與熙謀曰：「今到遼東。康必見我。我獨爲兄手擊之。且據其郡。猶可以自廣也。」康亦心規取尙以爲功。乃先置精勇于廬中。然後請尙熙。熙疑不欲進。尙強之。遂與俱入。未及坐。康叱伏兵禽之。坐于凍地。尙謂康曰：「未死之間。寒不可忍。可相與席。」康曰：「謹案。陳志作熙。後卿頭顱方行萬里。何席之爲。」遂斬首送操。原注。吳書尚有弟名買。與尙俱走遼東。曹瞞傳云。買。尙兄子。未詳。紹從兄遺字伯業爲長安令。河間張超薦于太尉朱儁。稱遺有冠世之才。幹時之略。其忠允亮直。固天所縱。若乃包羅載籍。管綜百氏。登高能賦。覩物知名。求之今日。邈焉靡儔。儁遂辟遺。累遷山陽太守。舉兵討卓。後失官。紹乃用爲揚州刺史。袁術攻之。敗死。曹操稱長大而能勤學者。惟吾與袁伯業爾。原注。肅宗論曰。袁紹初以豪俠得衆。遂懷雄霸之圖。天下勝兵舉旗者。莫不假以爲名。及臨場決敵。則悍夫爭命。深籌高議。則智士傾心。盛哉乎其所資也。韓非曰。很剛而不和。慢過而好勝。嫡子輕之謂亡徵。而庶子重斯。

袁術上

袁術字公路。司空逢之子。紹之從弟也。少以俠氣聞。數與諸公子飛鷹走狗。後頗折節。舉孝廉。歷職內外。累遷河南尹。虎賁中郎將。靈帝崩。與紹共誅宦官。董卓欲廢立。以術爲後將軍。術畏卓。出奔南陽。會長沙太守孫堅殺南陽太守張咨。引兵從術。劉表上術爲南陽太守。原注。案獻帝初平元年。袁術據南陽。後漢書。術傳云。劉表上術爲南陽太守。表傳云。術阻兵屯魯陽。表不得至荊州。陳志術傳。孫堅殺張咨。術得據南陽。魏武帝紀。此年三月。術阻兵已云術屯南陽。蓋術初奔魯陽。此春孫堅取南陽。術乃據之。猶以魯陽爲治所也。關東諸將議以靈帝失道。使天

下叛亂少帝幼弱爲賊臣所立又不識母氏所出幽州牧劉虞宿有德望欲立爲主紹與冀州牧韓馥使人報術術觀漢室衰陵陰懷異志故外託公義以拒紹紹復與術書曰前與韓文節共建永世之道欲海內見再興之主今西有名有幼君無血脉之屬公卿以下皆媚事卓安可復信但當使兵往屯關要皆自蹙死于西東立聖君太平可冀如何有疑又室家見戮不念子皆可復北面乎原注 史記 伍子胥名員父曰
建于楚平王殺之著爲太傅并殺奢及尙貞遂奔吳事吳
王闔廬導之伐楚入郢掘楚平王墓出其屍鞭之三百遠天不祥願詳思之術答曰聖主聰叡有周成之質賊卓因危亂之際威服百僚此乃漢家小厄之會亂尙未厭復欲興之乃云今主無血脉之屬豈不謬乎先人以來奕世相承忠義爲先太傅公仁慈測隱雖知賊卓必爲禍害以信徇義不忍去也門戶滅絕死亡流漫幸蒙遠近來相助不因此時上討國賊下刷家恥而圖爲此非所敢聞又曰室家見戮可復北面此卓所爲豈國家哉君命天也天不可仇況非君命乎悽悽赤心志在滅卓不識其他會虞拒不從議遂寢術表孫堅行破虜將軍領豫州刺史使率荆豫之卒擊破董卓于陽人袁紹因堅討卓未反遣其將會稽周昕奪堅豫州術怒擊昕走之釁隙遂成術之得南陽戶口數百萬而術奢淫肆欲徵斂無度百姓苦之稍稍離散旣與紹有隙又與劉表不平乃各外交黨援以相圖術結公孫瓚而紹連劉表豪傑多附于紹術怒曰羣豎不從吾而從吾家奴乎又與公孫瓚書云紹非袁氏子紹聞大怒初平三年術遣孫堅擊劉表于襄陽堅戰死公孫瓚使昭烈合謀共逼紹紹與曹操會擊皆破之四年術爲劉表所逼引

軍入陳留屯封丘黑山餘賊及匈奴於扶羅等佐術與曹操戰于匡亭大敗退保雍丘又走襄邑操追擊連破之乃將其餘衆奔九江初揚州刺史陳溫卒紹遣袁遺領州術攻遺敗走沛國爲亂兵所殺術用下邳陳瑀爲之術敗欲赴壽春瑀拒不納術退保陰陵收兵攻瑀瑀敗走歸下邳殺揚州刺史陳溫領其州英雄記謂溫卒遣敗而瑀爲之記說爲詳故取之術自領州兼稱徐州伯以張勳橋蕤爲將軍李傕入長安欲結術爲援乃授術左

將軍假節封陽翟侯遣太傅馬日磾因循行拜授術奪日磾節拘留不遣日磾憂恚嘔血死術見識書言代漢者當塗高自云名字應之原注當塗高者魏也術自以原注當塗高者魏也術自以後也袁濟塗陳公族大夫袁氏其後也火生土故云以黃代赤遂有僭逆之謀又聞孫堅得傳國璽拘堅妻奪之原注吳書堅入洛掃除漢宗廟祠以太牢堅軍城南甄官井上日有五色氣舉軍驚怪莫有敢汲堅令人入井探得漢傳國璽文曰受命于天既壽永昌方圓四寸上紐交五龍上一角缺初黃門張讓等作亂劫天子出奔左右分散掌璽者以投井中江表傳案漢獻帝起居注云天子從河上還得六璽于閣上又太康之初孫皓送金璽六枚無有玉明其僞也虞喜志林曰傳國璽者乃漢高祖所佩秦皇帝璽世世傳受號曰傳國璽案傳國不在六璽之數安得總其說乎應氏漢官皇甫世紀其論六璽文義皆符漢官傳國璽文曰受命于天既壽且康永昌二字爲錯未知兩家何者爲得金玉之精率有光氣加以神器祕寶輝耀益彰蓋一代之奇觀將來之異聞而以不解之故強謂之僞不亦謬乎陳壽爲破虧傳亦除此說乎

•俱惑起居注不知六璽殊名與傳國爲七者也吳時無能刻玉故天子以金爲璽璽雖以金子文不異吳降而送璽者送天子六璽曩所得玉璽乃古人遺印不可施用天子之璽今以無有爲難不通其義者爾裴松之曰孫堅于興義之中最有忠烈之稱若得漢神器而潛匿不言此爲陰鬱異志豈所謂忠臣者乎吳史欲以爲國華而不知損堅之令德如其果然以傳子孫縱非六璽之數要非常人所蓄孫皓之降亦不得但送六璽而寶藏傳國也受命于天矣取于歸命之璽若如喜言則此璽今尙在孫門匹夫憤璧猶曰有罪而況斯物哉興平二年冬天子播越敗于曹陽術大會羣下因謂曰今海內鼎沸劉氏微弱吾家四世公輔百姓所歸欲應天順民于諸君何如衆莫敢對主簿閻象進曰昔周自后稷至于

文王積德累功三分天下猶服事殷明公雖奕世克昌孰若有周之盛漢室衰微未至殷紂之弊術默然使召張範範辭遣弟承往應之術問曰昔周室陵遲則有桓文之霸秦失其政漢接而用之今孤以土地之廣士人之衆欲徼福于齊桓擬迹于高祖可乎承對曰在德不在衆苟能用德以同天下之欲雖云匹夫霸王可也若陵僭無度干時而動衆之所棄誰能興之術不悅自孫堅死子策復領其部曲術遣擊揚州刺史劉繇破之策因據江東聞術欲僭號與書諫曰蓋上天垂司過之星原注 天官虛次有司非二星 主司過失聖王建敢諫之鼓原注 鄭析子 墓置敢諫之鼓 舞立誹謗之木設非謬之備急箴闕之言何哉凡有所長必有所短也去冬傳有大計無不悚懼旋知供備貢獻萬夫解惑頃練建議復欲追遼前圖卽事之期便有定月益使撫然想是流妄設其必爾民何望乎曩者董卓無道輒擅廢立陵虐王室敢行弑逆禍加太后暴及宏農略烝宮人發掘陵寢焚毀宗廟殘賊忠良劫遷乘輿天子播越是以豪傑發憤沛然俱起神武外振元惡內斃幼主東顧乃俾保傅奉宣明命使各罷兵修文偃武與之更始而河北通謀黑山曹操放毒東徐劉表稱亂南荆公孫無然朔北正禮阻兵江滻元德爭盟淮陽是以未獲承命棄弓戢戈當謂使君與國同規乃舍是弗恤完然有自取之志豈海內所望之意哉昔成湯伐桀稱有夏多罪武王伐紂曰殷有重罰此二王者雖有聖德宜當君世使時無失道亦無由逼取之也今幼主非有惡于天下徒以春秋尚少脅于強臣而欲奪之懼非湯武之舉也卓雖狂狡猶不敢廢主自立以中土希戰之兵當邊地勁悍之虜是以斯須遊魂尋已

斃滅。今四方之人皆便戰鬪。各據方州。地廣兵強。乃欲爲卓所不爲。以逆臨之。是取禍也。且天下神器不可虛干。殷湯有白鳩之祥。周武有赤鳥之瑞。漢高有星聚之符。世祖有神光之徵。

原注·漢書元年冬十月五星聚于東井沛公至霸

上後漢書·南頓君生光武于縣舍·有赤光照室中皆因民之困瘁于桀紂之政。毒苦于秦莽之役。故能芟去無道。致成其志。今天

下非患于幼主尊明無受命之德。一旦登卽尊位。祇聚天下之兵爾。天子之貴四海之富。夫誰不欲義不可也。是以陳勝項籍王莽公孫述之徒。皆南面稱孤。莫之能濟。可以爲監。又聞幼主明智聰敏。有夙成之德。天下咸歸心焉。若除其偏輔而相之。必成中興之業。致周之盛。則旦奭之美。率土所望。縱使幼主有他改異。猶望推宗室之譜。屬論近親之賢良。以紹漢統。而固劉宗。比跡周霍。書功金石。圖形丹青。流慶罔極。使君五世相承。原注·安生京·京生湯·湯生達·達生術·凡五世爲漢臺輔。榮寵之盛。莫與爲比。宜效忠守節。扶國家之躡頓。念社稷之危阽。以奉祖考之志。報漢室之恩。夫忽履道之節。而強進取之欲者。曲惑圖緯之言。妄牽非類之文。苟以悅主爲美。不顧成敗之計。謂天下之人。非家吏則門生也。孰不從我。四方之敵。非吾匹則吾役也。誰能違我。盍乘累世之勢。起而取之哉。爲難圖之事。抗難保之勢。以徼羣敵之氣。生衆人之心。反忠爲逆。累世之公族。一舉而喪之後。雖有悔。恐無及矣。忠言逆耳。幸留神聽。術不納策。遂絕之。

袁術下

建安二年。因河內張炯符命。遂僭號。自稱仲家。謹案·仲家與後漢書合·魏志作仲氏以九江太守爲淮南尹。置公卿百官。郊

祀天地。沛相陳珪故太尉球弟子也。術與珪俱公族子孫。少共交遊。書與珪曰。昔秦失其政。天下羣雄爭而取之。兼智勇者卒受其歸。今世事紛擾。復有瓦解之勢矣。誠英乂有爲之時也。與足下舊交。豈肯左右之乎。若集大事。子實爲吾心膂。珪中子應時在下邳。術並脅質。應圖必致。珪答書曰。昔秦末世肆暴恣情。虐流天下。毒被生民。下不堪命。故遂土崩。今雖季世。未有亡秦苛暴之亂也。曹將軍神武應期。興復典刑。將撥平凶慝。清定海內。信有徵矣。以爲足下當戮力同心。匡翼漢室。而陰謀不軌。以身試禍。豈不痛哉。若迷而知反。尙可以免。吾備舊知。故陳至情。雖逆于耳。骨肉之惠也。欲吾營私阿附。有死不能。術欲以故堯州刺史金尙爲太尉。不許而逃。術追殺之。乃遣使者韓允以稱帝事告呂布。并爲其子聘布女。布執允送許。術大怒。遣其將張勳橋蕤攻布。大敗而還。術又率兵擊陳國。誘殺其王寵及相駱俊。曹操乃自征之。術聞大駭。卽走渡淮。留張勳橋蕤于蘄。以拒操。操擊破之。斬蕤。勳退走。術兵弱。將死。衆情離叛。加天旱歲荒。士民凍餒。江淮間相食殆盡。時舒仲應爲術沛相。術以米十萬斛與爲軍糧。仲應悉散以給飢民。術聞怒。陳兵將斬之。仲應曰。知當必死。故爲之爾。寧以一人之命救百姓于塗炭。術下馬牽之曰。仲應足下獨欲享天下重名。不與吾共之邪。術雖矜名尙奇。而天性驕肆。尊己陵物。及竊僞號。淫侈滋甚。腰御數百。無不兼羅納厭。梁肉原注·九州春秋·司隸馮方女·國色也·避亂揚州·術登城見而悅之·遂納焉·甚愛幸·諸婦害其寵·語之曰·將軍貴人有志節·當時時涕泣憂愁·必長見敬重·馮氏以爲然·後見術輒垂涕·術果以有意志·益哀之·諸婦人因共絞殺·懸之。自下飢困。莫之簡卹。于是資實空盡。不能自立。四年夏。乃燒宮室。

奔其部曲陳簡。謹案·陳簡與後漢書合·陳志作陳闡。雷薄于灤山復爲簡等所拒。遂大困窮。士卒散走。憂懼不知所爲。遂歸帝號于紹。曰：「祿去漢室久矣。天下提挈政在家門。豪雄角逐分割疆宇。此與周末七國無異。惟強者兼之。爾袁氏受命當王。符瑞炳然。今君擁有四州。人戶百萬。以強則莫與爭大。以位則無所比高。曹操雖欲扶衰獎微。安能續絕運起已滅乎？」謹歸大命。君其興之。紹陰然其計。術因欲北至青州。從袁譚。曹操使昭烈徵之。不得過。復走還壽春。六月至江亭。去壽春八十里。問糧儲。祇有麥屑三十斛。盛暑求蜜漿。不獲。坐簧牀良久。乃大咤曰：「袁術乃至是乎！」頓伏牀下。嘔血斗餘死。術從弟允畏曹操。不敢入壽春。奉術柩及妻子。依故吏廬江太守劉勳。孫策破勳。復見收視。術女入孫權宮。子燿仕吳爲郎中。原注·陳志董卓·袁紹·袁術·劉表共一傳·評曰·董卓狠戾賊忍·暴虐不仁·自書契以來·殆未之有也·袁術奢淫放肆·榮不終已·自取之也·袁紹劉表·咸有威容器觀·知名當世·表跨蹈漢南·紹儻揚河朔·然皆外寬內忌·好謀無決·有才而不能用·聞善而不能納·廢嫡立庶·舍禮崇愛·至于後嗣顛蹶·社稷傾覆·非不幸也·昔項羽背范增之謀·以喪其王業·紹之殺田豐·乃甚于羽遠矣·裴松之曰·桀紂無道·秦莽縱虐·皆多歷年所·然後衆惡乃著·董卓自竊權柄·至于隕斃·計其日月·未盈三周·而禍崇山岳·毒流四海·其殘忍之性·實豺狼不若·書契未有·斯吾爲當·但評旣曰賊忍·又云不仁·賊忍不仁·于辭爲重·袁術無毫芒之功·繢芥之善·而猖狂于時·妄自尊立·固義夫之所扼腕·人神之所同疾·雖復恭儉節用·而猶必覆亡不暇·而評但云奢淫不終其大惡見未足見

議曰：袁氏奕世公鼎高風義，軌冠冕海內。紹資望夙著，一旦提劍而起，汎除閹豎，肅清宮闈，心不義卓，投袂而起，則有英雄之志矣。于是山東討賊，推爲盟主。河朔服義，讓以方州。卒連幽并，青冀橫制，天下之半。材勇效命，智謀貢策，翼戴天子而加之以共，則桓文之舉也。乃猜忌自用，潛懷不軌，稽失事機，爲操所先。

忿兵犯順折衄以死。幼長倒置禍起骨肉。家聲委地。咸其自取也。術特冢中枯骨。敢奸大分。罪浮于紹矣。沮授田豐。計畫不用。而不能去。卒蹈其難。其猶在亞父之後乎。原注·史記·項羽疑范增·稍奪其權·范增怒曰未至彭城·疽發背死。審配慷慨壯烈。死于袁氏。豈君子之澤。猶未斬也。劉表譬解譚尙。深明嫡庶長幼之分。而身惑于琮琦。可謂九江之靈。靈于人而不靈于己者也。原注·書·九江納錫大龜·莊子·仲尼曰·神龜能見夢于元君·而不能避余且之網·知能七十二鑽而無遺筭·不能避剝腸之患·如是則知有所困·神有所不及也。

贊曰。二昆挺挺志清王路。豪勇嗇禍。闕覩僭據。得雉失盧。夫豈操敵。隕身赤宗。諸子狼藉。豐授智計。豈劣攸詡。事非其人。詒誚千古。

